



水  
經  
注  
釋

ル 5
139
12





凡 5  
139  
12

水經注釋卷三十四

江水二

仁和趙一清誠夫錄

又東過巫縣南鹽水從縣東南流注之

江水又東烏飛水注之水出天門郡澗中縣界北流逕  
建平郡沙渠縣南又北流逕巫縣南西北歷山道三百  
七十里注于江謂之烏飛口江水又東逕巫縣故城南  
縣故楚之巫郡也秦省郡立縣以隸南郡吳孫休分爲  
建平郡治巫城城緣山爲墉周十二里一百一十步東  
西北三面皆帶傍深谷南臨大江故謂之夔國也江水

又東巫溪水注之溪水導源梁州晉昌郡之宣漢縣東  
又南逕建平郡秦昌縣南又逕北井縣西東轉歷其縣  
北水南有鹽井井在縣北故縣名北井建平一郡之所  
資也鹽水下通巫溪溪水是兼鹽水之稱矣溪水又南  
屈逕巫縣東縣之東北三百步有聖泉謂之孔子泉其  
水飛清石穴潔並高泉下注溪水溪水又南入于大江  
江水又東逕巫峽杜宇所鑿以通江水也郭仲產云按  
地理志巫山在縣西南而今縣東有巫山將郡縣居治  
無恆故也江水歷峽東逕新崩灘此山漢和帝永元十  
二年崩晉太元二年又崩當崩之日水逆流百餘里湧

起數十丈今灘上有石或圓如簞或方似屋若此者甚  
衆皆崩崖所隕致怒湍流故謂之新崩灘其頽巖所餘  
比之諸嶺尚爲竦桀其下十餘里有大巫山非唯三峽  
所無乃當抗峰岷峨偕嶺衡疑其翼附羣山並槩青雲  
更就霄漢辨其優劣耳神孟涂所處山海經曰夏后啟  
之臣曰孟涂是司神于巴巴人訟于孟涂之所其衣有  
血者執之是請生居山上在丹山西郭景純云丹山在  
丹陽屬巴丹山西卽巫山者也又帝女居焉宋玉所謂  
天帝之季女名曰瑤姬未行而亡封于巫山之陽一清按李  
善高唐賦注引襄陽耆舊傳曰赤帝精魂爲草實爲靈  
女瑤姬未行而亡葬于巫山之陽

芝所謂巫山之女高唐之岨且為行雲暮為行雨朝朝  
暮暮陽臺之下且早視之果如其言故為立廟號朝雲  
焉其間首尾一百六十里謂之巫峽蓋因山為名也自  
三峽七百里中兩岸連山略無闕處重巖疊嶂隱天蔽  
日自非停午夜分不見曦月至于夏水襄陵沿沂阻絕  
或王命急宣有時朝發白帝暮到江陵其間千二百里  
雖乘奔御風不似疾也春冬之時則素湍淩潭迴清倒  
影絕巖多生檉柏一清按御覽引此文作怪柏懸泉瀑布飛漱其間  
清榮峻茂良多趣味每至晴初霜旦林寒澗肅常有高  
猿長嘯屬引淒異空谷傳響哀轉久絕故漁者歌曰巴

東三峽巫峽長猿鳴

按寰宇記作清猿

三聲淚沾裳江水又東

逕石門灘灘北岸有山山上合下開洞達東西緣江步

路所由劉備為陸遜所破走逕此門追者甚急備乃燒  
鎧斷道孫桓為遜前驅奮不顧命斬上夔道截其要徑  
備踰山越險僅乃得免忿恚而嘆曰吾昔至京桓尚小  
兒而今迫孤乃至于此遂發憤而薨矣

又東過秭歸縣之南

縣故歸鄉地理志曰歸子國也樂緯曰昔歸典叶聲律  
宋忠曰歸即夔歸鄉蓋夔鄉矣古楚之嫡嗣有熊摯者  
以廢疾不立而居于夔為楚附庸後王命為夔子春秋

僖公二十六年楚以其不祀滅之者也袁山松曰屈原有賢姊聞原放逐亦來歸喻令自寬全鄉人冀其見從因名曰秭歸卽離騷所謂女嬃嬋媛以詈余也縣城東北依山卽坂周回二里高一丈五尺南臨大江古老相傳謂之劉備城蓋備征吳所築也縣東北數十里有屈原舊田宅雖畦堰糜漫猶保屈田之稱也縣北一百六十里有屈原故宅累石爲屋基名其地曰樂平里宅之東北六十里有女嬃廟擣衣石猶存故宜都記曰秭歸蓋楚子熊繹之始國全氏曰按既曰熊繹之始國則非熊摯附庸所居矣自相參辰何也而屈原之鄉里也原田宅于今具存指謂此也江水又

東逕其城北城憑嶺作固二百一十步夾谿臨谷據山

枕江北對丹楊城城據山跨阜周八里二百八十步東

北兩面悉臨絕澗西帶亭下溪南枕大江嶮峭壁立信

天固也楚子熊繹始封丹陽之所都也地理志以爲吳

之丹楊論者云尋吳楚悠隔縵縵荆山無容遠在吳境

是爲非也一清按班志此文在丹陽郡丹陽縣下然觀

而闢子革僻處荆山之語則枝江爲近鄴氏故辭又楚之先王陵墓在其間蓋爲徵矣江水又東南

逕夔城南城跨據川阜周回一里百一十八步西北背

枕深谷東帶鄉口溪南側大江城內西北角有金城東

北角有員土獄西南角有石井口徑五尺熊摯始治巫

城後疾移此蓋夔徙也全氏曰熊摯不得為熊春秋左  
 傳後故封夔非自巫徙傳僖公二十六年楚令尹子玉滅夔者也服虔曰在巫  
 之陽秭歸歸鄉矣江水又東逕歸鄉縣故城北袁山松  
 曰父老傳言原既流放忽然暫歸鄉人喜悅因名曰歸  
 鄉抑其山秀水清故出雋異地嶮流疾故其性亦隘詩  
 云惟嶽降神生甫及申信與余謂袁山松此言可謂因  
 事而立證恐非名縣之本旨矣縣城南面重嶺北背大  
 江東帶鄉口溪溪源出縣東南數百里西北入縣逕狗  
 峽西峽崖龕中石隱起有狗形形狀具足故以狗名峽  
 鄉口溪又西北逕縣下入江謂之鄉口也江水又東逕

信陵縣南臨大江東傍深溪溪源北發梁州上庸縣界  
 南流逕縣下而注于大江也

又東過夷陵縣南

江水自建平至東界峽盛宏之謂之空泠峽峽甚高峻  
 卽宜都建平二郡界也其間遠望勢交嶺表有五六峰  
 參差互出上有奇石如二人像攘袂相對俗傳兩郡督  
 郵爭界於此宜都督郵厥勢小東傾議者以為不如也  
 江水歷峽東逕宜昌縣之插窰下江之左岸絕岸壁立  
 數百丈飛鳥所不能棲有一火燼插在崖間望見可長  
 數丈父老傳言昔洪水之時人薄舟崖側以餘燼插之

巖側至今猶存故先後相承謂之插竈也江水又東逕流頭灘其水竝峻激奔暴魚鼈所不能游行者常苦之其歌曰灘頭白勃堅相持倏忽淪沒別無期袁山松曰自蜀至此五千餘里下水五日上水百日也江水又東逕宜昌縣北分夷道很山所立也縣治江之南岸北枕大江與夷陵對界宜都記曰渡流頭灘十里便得宜昌縣也江水又東逕狼尾灘而歷人灘袁山松曰二灘相去二里人灘水至峻峭南岸有青石夏沒冬出其石嶽峯數十步中悉作人面形或大或小其分明者鬚髮皆具因名曰人灘也江水又東逕黃牛山下有灘名曰黃

牛灘南岸重嶺疊起最外高崖間有石色如人負刀牽牛人黑牛黃成就分明既人跡所絕莫得究焉此巖既高加以江湍紆迴雖途經信宿猶望見此物故行者謠曰朝發黃牛暮宿黃牛三朝三暮黃牛如故言水路紆深迴望如一矣江水又東逕西陵峽宜都記曰自黃牛灘東入西陵界至峽口一百許里山水紆曲而兩岸高山重嶂非日中夜半不見日月絕壁或千許丈其石彩色形容多所像類林木高茂略盡冬春猿鳴至清山谷傳響泠泠不絕所謂三峽此其一也山松言常聞峽中水疾書記及口傳悉以臨懼相戒曾無稱有山水之美

也及余來踐齋此意既至欣然始信耳聞之不如親見  
矣其壘嶠秀峰奇構異形固難以辭敘林木蕭森離離  
蔚蔚乃在霞氣之表仰矚俯映彌習彌佳流連信宿不  
覺忘返目所履歷未嘗有也既自欣得此奇觀山水有  
靈亦當驚知己于千古矣江水歷禹斷江南峽北有七  
谷村兩山間有水清深潭而不流又耆舊傳言昔是大  
江及禹治水此江小不足瀉水禹更開今峽口水勢并  
衝此江遂絕于今謂之斷江也江水出峽東南流逕故  
城洲洲附北岸洲頭曰郭洲長二里廣一里上有步闌  
故城方圓稱洲周回略滿故城洲上城周一里吳西陵

督步騭所築也孫皓鳳凰元年騭息闡復爲西陵督據  
此城降晉晉遣太傅羊祜接援未至爲陸抗所陷也江  
水又東逕故城北所謂陸抗城也城卽山爲墉四面天  
險江南岸有山孤秀從江中仰望壁立峻絕袁山松爲  
郡嘗登之矚望焉故其記云今自山南上至其嶺嶺容  
十許人四面望諸山略盡其勢俯臨大江如縈帶焉視  
舟如鳧雁矣北對夷陵縣之故城城南臨大江秦令白  
起代楚三戰而燒夷陵者也應劭曰夷山在西北蓋因  
山以名縣也王莽改曰居利吳黃武元年更名西陵也  
後復曰夷陵縣北三十里有石穴名曰馬穿嘗有白馬



出穴食人逐之入穴潛行出漢中漢中人失馬亦嘗出此穴相去數千里袁山松言江北多連山登之望江南諸山數十百里莫識其名高者千仞多奇形異勢自非烟霏雨霽不辨見此遠山矣余嘗往返十許過正可再見遠峰耳江水又東逕白鹿巖沿江有峻壁百餘丈猿所不能遊有一白鹿陵峭登崖乘巖而上故世名此巖爲白鹿云江水又東歷荆門虎牙之間荆門在南上合下開閭徹山南有門像虎牙在北石壁色紅間有白文類牙形並以物像受名此二山楚之西塞也水勢急峻故郭景純江賦曰虎牙桀豎以屹峩荆門鬪竦而盤薄

圓淵九迴以懸騰溢流雷响而電激者也漢建武十一年公孫述遣其大司徒任滿翼江王田戎將兵數萬據嶮爲浮橋橫江以絕水路營壘跨山以塞陸道光武遣吳漢岑彭將六萬人擊荆門漢等率舟師攻之直衝浮橋因風縱火遂斬滿等矣

又東南過夷道縣北夷水從狼山縣南東北注之

夷道縣漢武帝伐西南夷路由此出故曰夷道矣王莽更名江南桓溫父名彝改曰西道魏武臨江分南郡置臨江郡劉備改曰宜都郡治在縣東四百步故城吳丞相陸遜所築也爲二江之會也

全氏曰按夷水別名清江其入江也有涇渭之

水經注釋 江水二

分故曰二 北有湖里淵淵上橋柚蔽野桑麻闇日西望  
江之會 很山諸嶺重峰疊秀青翠相臨時有丹霞白雲遊曳其  
上城東北有望堂地特峻下臨清江遊矚之名處也縣  
北有女觀山厥處高顯回眺極目古老傳言昔有思婦  
夫官於蜀屢愆秋期登此山絕望憂感而死山木枯悴  
鞠為童枯鄉人哀之因名此山為女觀焉葬之山頂今  
孤墳尚存矣

又東過枝江縣南沮水從北來注之

江水又東逕上明城北晉太元中苻堅之寇荊州也刺  
史桓冲徙渡江南使劉波築之移州治此城其地夷敞

北據大江江沱枝分東入大江縣治洲上故以枝江為  
稱地理志曰江沱出西南東入江是也其民古羅徙羅  
故居宜城西山楚文王又徙之于長沙今羅縣是矣縣  
西三里有津鄉津鄉里名也春秋莊公十九年巴人伐  
楚楚子禦之大敗于津應劭曰南郡江陵有津鄉今則  
無聞矣郭仲產云尋楚禦巴人枝江是其塗便此津鄉  
殆即其地也盛宏之曰縣舊治沮中後移出百里洲西  
去郡一百六十里縣左右有數十洲槃布江中其百里  
州最為大也中有桑田甘果映江依洲自縣西至上明  
東及江津其中有九十九洲楚諺云洲不百故不出王

者桓元有問鼎之志乃增一洲以充百數僭號數旬宗滅身屠及其傾敗洲亦消毀今上在西忽有一洲自生沙流迴薄成不淹時其後未幾龍飛江漢矣日知錄曰凡引用前人人之言必用前文水經注引盛宏之荆州記所指今上則南宋文帝以宜都王即帝位之事古人不以爲嫌縣東二里有縣人劉凝之故宅凝之字志安兄盛公高尚不仕凝之慕老萊嚴子陵之爲人立屋江湖非力不食妻梁州刺史郭詮女亦能安貧宋元嘉中夫妻隱于衡山終焉不返矣縣東北十里土臺北岸有迤洲長十餘里義熙初烈武王斬桓謙處縣東南二十里富城洲上有道士范儋精廬自言巴東人少遊荆土而多盤桓

縣界惡衣麤食蕭散自得言來事多驗而辭不可詳人心欲見歛然而對貌言尋求終弗遇也雖逕跨諸洲而舟人未嘗見其濟涉也後東遊廣陵卒于彼土儋在洲無定止處宿憩一小菴而已弟子慕之於其昔遊共立精舍以存其人縣有陳畱王子香廟頌子香于漢和帝之時出爲荊州刺史有惠政天子徵之道卒枝江亭中常有三白虎出入人間送喪踰境百姓追美甘棠以承元十八年立廟設祠刻石銘德號曰枝江白虎王君其子孫至今猶謂之爲白虎王江水又東會沮口楚昭所謂江漢沮漳楚之望也

又南過江陵縣南

縣北有洲號曰枚迴洲全氏曰或云枝江所江水自此

兩分而為南北江也禹貢錐指曰袁中道澧遊記曰

南北江之名南江即江水由澧入洞庭者也澧谷變遷

今之大江始獨專其澎湃而南江之跡稍稍湮滅僅為

衣帶細流然江水會澧故道猶可考云小修此義最為

精覈水經注澧水自石門以西與導江無涉其南江會

澧故道參以近志東入洞庭此導江東至于澧過九江

至于東陵之故道也一清按水經及注則是澧水注江

非江會澧所北江有故鄉洲元興之末桓元西奔毛祐

之與參軍費恬射元于此洲元子昇年六歲輒拔去之

王韶之云元之初奔也經日不得食左右進粗粥咽不

下昇抱元胸撫之元悲不自勝至此益州都護馮遷斬

元於此洲斬昇於江陵矣下有龍洲洲東有寵洲二洲

之間世擅多魚矣漁者投罟歷網往往維絕有潛客泳

而視之見水下有兩石牛嘗為醫害矣故漁者莫不擊

浪浮舟鼓柁而去矣其下謂之邳里洲洲有高沙湖湖

東北有小水通江名曰曾口江水又東逕鷺尾洲北合

靈溪水水無泉源上承散水合成大溪南流注江江溪

之會有靈溪戍背阿面江西帶靈溪故戍得其名矣江

水東得馬牧口江水斷洲通會江水又東逕江陵縣故

城南禹貢荆及衡陽惟荆州蓋即荆山之稱而制州名

矣故楚也子革曰我先君僻處荆山以供王事遂遷紀

郢今城楚船官地也春秋之渚宮矣秦昭襄王二十九年使白起拔郢郢以漢南地而置南郡焉周書曰南國名也南氏有二臣力均勢敵競進爭權君弗能制南氏用分爲二南國也按韓嬰敘詩云其地在南郡南陽之閒呂氏春秋所謂禹自塗山巡省南土者也是郡取名焉後漢景帝以爲臨江王榮國王坐侵廟垣地爲宮被徵升車出北門而軸折父老竊流涕曰吾王不還矣自後北門不開蓋由榮非理終也漢景帝二年改爲江陵縣全氏曰秦置南郡即治江陵高帝元年改郡名曰臨江以封共敖而本表曰都江陵高帝五年復曰南郡景帝二年又曰臨江郡以封子榮中二年復曰南郡爲南郡蓋郡名有更易縣名無改移注非是王莽更名

南順縣曰江陸舊城關羽所築羽北圍曹仁呂蒙襲而據之羽曰此城吾所築不可攻也乃引而退杜元凱之攻江陵也城上人以瓠繫狗頸示之元凱病瘿故也及城陷殺城中老小血流沾足論者以此薄之江陵城地東南傾故緣以金堤自靈溪始桓溫令陳遵造遵善於方功使人打鼓遠聽之知地勢高下依傍創築略無差矣城西有柄霞樓俯臨通隍吐納江流城南有馬牧城西側馬徑此洲始自枚迴下迄於此長七十餘里洲上有奉城故江津長所治舊主度州郡貢於洛陽因謂之奉城亦曰江津戍也戍南對馬頭岸昔陸抗屯此與羊

水經注釋卷三十四終  
祜相對大宏信義談者以為華元子反復見于今矣北對大岸謂之江津口故洲亦取名焉江大自此始也家語曰江水至江津非方舟避風不可涉也故郭景純曰濟江津以起漲言其深廣也江水又東逕郢城南子囊遺言所築城也地理志曰楚別邑故郢矣王莽以為郢亭城中有趙臺卿冢岐平生自所營也冢圖賓主之容用存情好敘其宿尚矣江水又東得豫章口夏水所通也西北有豫章岡蓋因岡而得名矣或言因楚王豫章臺名所未詳也

水經注釋卷三十四終

海甯錢保塘  
華陽吳祖椿覆校

水經注釋卷三十五

仁和趙一清誠夫錄

江水三

又東至華容縣西夏水出焉

江水左迤為中夏水右則中郎浦出焉江浦右迤南派屈西極水曲之地勢世謂之江曲者也

又東南當華容縣南涌水出焉

江水又東涌水注之水自夏水南通于江二水之間謂之涌口春秋左氏傳所謂閭敖遊涌而逸者也江水又逕南平郡孱陵縣之樂鄉城北吳陸抗所築後王濬攻

之獲吳水軍督陸景於此渚也

又東南油水從東南來注之

又東右合油口又東逕公安縣北劉備之奔江陵使築

而鎮之曹公聞孫權以荊州借備臨書落筆杜預克定

江南罷華容置之一清按此處脫誤 謂之江安縣南郡 甚多不可強通

治吳以華容之南鄉為南郡晉太康元年改曰南平也

縣有油水水東有景口口即武陵郡界景口東有淪口

淪水南與景水合又南通澧水及諸陂湖自此淵池相

接悉是南蠻府屯也故側江有大城相承云倉儲城即

邸閣也江水左會高口江浦也右對黃州一清按寰宇記云公安縣

有黃山字或作皇昔人呼為睢山今或呼為玉山黃州蓋以山得名江水又東得故市口

水與高水通也江水又右逕楊岐山北山枕大江山東

有城故華容縣尉舊治也大江又東左合子夏口江水

左迤北出通于夏水故曰子夏也大江又東左得侯臺

水口江浦也大江右得龍穴水口江浦右迤也北對虎

洲又洲北有龍巢地名也昔禹南濟江黃龍夾舟舟人

五色無主禹笑曰吾受命于天竭力養民生性也死命

也何憂龍哉於是二龍弭鱗掉尾而去焉故水地取名

矣江水自龍巢而東得俞口夏水泛盛則有冬無之江

之北岸上有小城故監利縣尉治也又東得清揚土塢

水經注釋 江水三  
二口江浦也大江右逕石首山北又東逕赭要赭要洲  
名在大江中次北湖洲下江水左得飯筐上口秋夏水  
通下口間相距三十餘里赭要下卽楊子洲在大江中  
二洲之間常苦蛟害昔荆飲飛濟此遇兩蛟斬之自後  
罕有所患矣江之右岸則清水口口上卽錢官也水自  
牛皮山東北通江北對清水洲洲下接生江洲南卽生  
江口水南通澧浦江水右會飯筐下口江浦所入也江  
水又右得上檀浦江澆也江水又東逕竹町南江中有  
觀洋澆澆東有大洲洲東分爲爵洲洲南對湘江口也  
又東至長沙下雋縣北澧水沅水資水合東流注之

凡此諸水皆注于洞庭之陂是乃湘水非江川也  
湘水從南來注之

江水右會湘水所謂江水會者也江水又東左得二夏  
浦俗謂之西江口又東逕忌置山南山東卽隱口浦矣  
江之右岸有城陵山山有故城東接微落山亦曰暉落  
巖江之南畔名黃金瀨瀨東有黃金浦良父口夏浦也  
又東逕彭城口水東有彭城巖故水受其名卽玉澗水  
出巴邱縣東玉山玉溪北流注于江江水自彭城巖東  
逕如山北北對隱巖二巖之間大江之中有獨石孤立  
大江中山東江浦世謂之白馬口江水又左逕白螺山



南右歷鴨蘭巖北江中山也東得鴨蘭治浦二口夏浦也江水左逕上烏林南村居地名也又東逕烏黎口江浦也卽中烏林矣又東逕下烏林南吳黃蓋敗魏武于烏林卽是處也江水又東左得子練口北通練浦又東合練口江浦也南直練洲練名所以生也江之右岸得蒲巖口卽陸口也水出下雋縣西三山溪其水東逕陸城北又東逕下雋縣南故長沙舊縣王莽之閭雋也宋元嘉十六年割隸巴陵郡陸水又屈而西北流又逕其縣北北對金城吳將陸渙所屯也陸水又入蒲圻縣北逕呂蒙城西昔孫權征長沙零桂所鎮也陸水又逕蒲

巖山北入大江謂之刀環口又東逕蒲巖山北對蒲圻洲亦曰擎洲又曰南洲洲頭卽蒲圻縣治也晉太康元年置洲上有白面洲洲南又有瀑口水出豫章艾縣東入蒲圻縣至沙陽西北魚嶽山入江山在大江中楊子洲南孤峙中洲江水左得中陽水口又東得白沙口一名沙屯卽麻屯口也本名菽默口江浦矣南直蒲圻洲水北入百餘里吳所屯也又逕魚嶽山北下得金梁洲洲東北對淵洲一名淵步洲江濱從洲頭以上悉壁立無岸歷專岐至白沙方有浦上甚難江中有沙陽洲沙陽縣治也縣本江夏之沙羨矣晉太康中改曰沙陽縣

宋元嘉十六年割隸巴陵郡江之右岸有雍口亦謂之港口東北流注長洋港又東北流逕石子岡岡上有故城卽州陵縣之故城也莊辛所言左州侯國矣又東逕州陵新治南王莽之江夏也港水東南流注于江謂之洋口南對龍穴洲沙陽洲之下尾也洲裏有駕部口宋景平二年迎文帝于江陵法駕頓此因以為名文帝車駕發江陵至此黑龍躍出負帝所乘舟左右失色上謂長史王曇首曰乃夏禹所以受天命矣我何德以堪之故有龍穴之名焉江水又東右得聶口江浦也左對聶洲江水左逕百人山南右逕赤壁山北昔周瑜與黃蓋

詐魏武大軍處所也江水東逕大軍山南山東有山屯

夏浦江水左迤也江中有石浮出謂之節度石右則塗

水注之水出江州武昌郡武昌縣泰山一清按寰宇記鄂州江夏縣下

云金水在縣南九十里出金山西注大江舊記云有金雞從雞翅山南飛產金于此故名蓋山水之殊目矣方輿紀要云塗水一名金水荆湘西北流逕汝南僑郡故

城南咸和中寇難南逼戶口南渡因置斯郡治于塗口

塗水歷縣西又西北流注于江江水又東逕小軍山南

臨側江津東有小軍浦江水又東逕雞翅山北山東卽

土城浦也

又東北至江夏沙羨縣西北沔水從北來注之

沌水上承沔陽縣之太白湖東南流為沌水逕沌陽縣

南注于江謂之沌口一清按有下落一字晉書陶侃傳侃率周訪進軍入湘使都尉

楊舉為先驅擊杜弢大破之而不言地名時侃屯沌口

明年徙林嶂即臨嶂矣顧祖禹曰臨嶂即沔陽是也胡

三省曰沔陽梁武帝時方置郡據沈約志陶侃為荊州

刺史初治沔陽則是時已有沔陽城矣當屬竟陵郡界

宋白曰復州沔陽縣漢縣也郡國志曰沔陽縣即楚王

城又晉惠帝元康九年分江夏西部都尉置竟陵郡治

石城此都尉疑即江夏陽都尉治晉永嘉六年王敦以

西部後易稱沔陽者也

陶侃為荊州鎮此明年徙林嶂江水又東逕歎父山南

對歎州亦曰炭步矣江之右岸當鸚鵡洲南有江水右

迤謂之驛渚三月之末水下通樊口水江水又東逕魯

山南古翼際山也地說曰漢與江合于衡北翼際山傍

者也山上有吳江夏太守陸渙所治城蓋取二水之名

地理志曰夏水過郡入江故曰江夏也舊治安陸漢高

帝六年置吳乃徙此城中有晉征南將軍荊州刺史胡

奮碑又有平南將軍王世將刻石記征杜曾事全氏曰

曾者是有劉琦墓及廟也山左即沔水口矣沔左有却

王廙王廙月城亦曰偃月壘戴監軍築故曲陵縣也後乃沙羨縣

治也昔魏將黃祖所守全氏曰劉表之將黃祖領江夏

骨朽久矣一清按道元蓋襲遣董襲凌統攻而禽之祖

用盛宏之荊州記之文而誤衡亦遇害於此衡恃才倜儻肆狂狷於無妄之世保身

不足遇非其死可謂咎悔之深矣江之右岸有船官浦

歷黃鵠巖西而南矣直鸚鵡洲之下尾江水澆洞汭浦

是日黃軍浦昔吳將黃蓋軍師所屯故浦得其名亦商

舟之所會矣船官浦東即黃鵠山林澗甚美譙郡戴仲

若野服居之庾林曰宋書戴顓字仲若譙郡鉅人衡陽王義季鎮京口長史張劭與顓姻通迎來

上黃鵠山山北有竹林精舍林澗甚美顓憇此澗義李亟從之遊太祖每欲見之嘗謂張敷曰吾東巡日當譙

戴公山也按此則仲若所住黃鵠乃京口之山鄠氏誤矣山下謂之黃鵠岸岸下有

灣目之為黃鵠灣黃鵠山東北對夏口城魏黃初二年

孫權所築也依山傍江開勢明遠憑墉藉阻高觀枕流

一清按高觀山名也亦曰高冠山在武昌縣城東南五里上則遊目流川下則激浪

崎嶇實舟人之所艱也對岸則入沔津故城以夏口為

名亦沙羨縣治也江水左得湖口水通太白湖又東合

灑口水上承沔水方輿紀要曰灑水本湏水分流注誤湏為沔於安陸縣而

東逕灑陽縣北東流注于江江水又東湖水自北南注

謂之嘉吳江右岸頗得二夏浦北對東城洲西浦側有

雍伏戍江之左岸東會龍驤水口出北山蠻中江之右

岸得武口水上通安陸之延頭宋元嘉二年衛將軍荆

州刺史謝晦阻兵上流為征北檀道濟所敗走奔于此

為戍主光順之所執處也南至武城俱入大江南直武

洲洲南對楊桂水口江水南出也通金女大文桃班三

治吳舊屯所在荊州界盡此江水東逕若城南庾仲雍

水經注釋 江水三

江記曰若城至武城口三十里者也南對郭口夏浦而不常泛矣東得苦菜夏浦浦東有苦菜口夏江逕其北故浦有苦菜之名焉山上有菜苦可食江水左得廣武口江浦也江之右岸有李姥浦浦中偏無蚊蚋之患矣北對崢嶸洲冠軍將軍劉毅破桓元於此洲元乃挾天子西走江陵矣

又東過邾縣南

江水東逕白虎巖北山臨側江濱又東會赤溪夏浦浦口江水右迤也又東逕貝巖北庾仲雍謂之沛岸矣江之右岸有秋口江浦也又東得烏石水出烏石山南流

注于江江水右得黎巖北亦曰黎岸也山東有夏浦又東逕上積北山名也仲雍謂之大小竹磧也北岸烽火州即舉洲也北對舉口仲雍作莒字得其音而忘其字非也舉水出龜頭山西北流逕龍戍南一清按方輿紀要黃州府麻城縣舉水下引水經注云舉水西北流逕蒙龍城南南史梁宗室安成王秀傳云司州叛蠻田魯生魯賢秀超據蒙籠來降魏書地形志南定州梁定州治蠻田超秀為蕭衍置治蒙龍城注有脫誤刺史舉水又西流左合垂山之水水北出垂山之陽與弋陽淠水同發一山故是水合之水之東有南口戍又南逕方山戍西西流注于舉水又西南逕梁司豫二州東蠻田魯生為刺史治湖陂城亦謂之水城也舉水又

水經注釋 江水三  
西南逕顏城南又西南逕齊安郡西倒水注之水出黃  
武山南逕白沙戍西又東南逕梁達城戍西東南合舉  
水舉水又東南歷赤亭下又謂之赤亭水又分爲二水  
南流注于江謂之舉口南對舉洲春秋左傳定公四年  
吳楚陳于柏舉京相璠曰漢東地矣江夏有沮水或作  
舉疑卽此也左水東南流入于江澣曰文方口江之右  
岸有鳳鳴口江浦也浦側有鳳鳴戍江水又東逕邾縣  
故城南楚宣王滅邾徙居于此故曰邾也漢高帝元年  
項羽封吳芮爲衡山王都此晉咸和中庾翼爲西陽太  
守分江夏立四年豫州刺史毛寶西陽太守樊俊共鎮

之爲石虎將張格度所陷自爾邱墟焉城南對蘆洲舊  
吳時築客舍于洲上方便唯所止焉亦謂之羅洲矣鄂  
縣北江水右得樊口庾仲雍江記云谷里袁口江津南  
入歷樊山上下三百里通新興馬頭二治樊口之北有  
灣昔孫權裝大船名之曰長安亦曰大船載坐直之士  
三千人與羣臣泛舟江津屬值風起權欲西取蘆洲谷  
利不從乃拔刀急上令取樊口薄船舶至岸而敗故名  
其處爲敗舶灣因鑿樊山爲路以上人卽名其處爲吳  
造峴在樊口上一里今厥處尙存江水又左逕赤鼻山  
南山臨側江川又東逕西陽郡南郡治卽西陽縣也晉

書地道記以為莖子國也江之右岸有鄂縣故城舊樊  
楚地世本稱熊渠封其中子之名某者為鄂王朱氏謀  
史記楚世家為中子紅晉太康地記以為東鄂矣九州記曰鄂今  
武昌也孫權以魏黃初元年自公安徙此改曰武昌縣  
鄂縣徙治于袁山東又以其年立為江夏郡分建業之  
民于家以益之至黃龍元年權遷都建業以陸遜輔太  
子鎮武昌孫皓亦都之皓還東令滕牧守之晉惠帝永  
平中始置江州傅綜為刺史治此城後太尉庾亮之所  
鎮也今武昌郡治城南有袁山即樊山也武昌記曰樊  
口南有大姥廟孫權嘗獵于山下依夕見一姥問權獵

何所得曰正得一豹母曰何不豎豹尾忽然不見應劭  
漢官序曰豹尾過後執金吾罷屯解圍天子鹵簿中後  
屬車施豹尾於道路豹尾之內為省中蓋權事應在此  
故為立廟也又孫皓亦嘗登之使將害常侍王蕃而以  
其首虎爭之北背大江江上有釣臺權嘗極飲其上曰  
墮臺醉乃已張昭盡言處城西有郊壇權告天即位于  
此顧謂公卿曰魯子敬嘗言此可謂明于事勢矣城東  
故城言漢將灌嬰所築也江中有節度石三段廣百步  
高五六丈是西陽武昌界分江于斯石也又東得五丈  
浦又東得次浦江浦也東逕五嶼北有五山沿次江陰

故得是名矣仲雍謂之五圻江水左則巴水注之水出  
 雩婁縣之下靈山即大別山也與決水同出一山故世  
 謂之分水山亦或曰巴山南歷蠻中吳時舊立屯於水  
 側引巴水以溉野又南逕巴水戍南流注于江謂之巴  
 口又東逕鞏縣故城南故茲國也全氏曰此是漢志語而前西陽郡下又引  
王隱晉書地道記是為複也春秋僖公五年秋楚滅弦弦子奔黃者  
 也漢惠帝元年封長沙相利倉沈氏曰漢表作黎朱倉此從史表為侯  
 國城在山之陽南對五洲也江中有五洲相接故以五  
 洲為名宋孝武帝舉兵江州建牙洲上有紫雲蔭之即  
 是洲也東會希水口水出潯縣霍山西麓山北有潯縣

故城地理志曰縣南有天柱山即霍山也有祠南嶽廟  
音潛 譚氏元春日二字恐非正文一清按友夏之言是也二字注中注漢志注晉灼曰音潛齊立  
 霍州治此西南流分為二水枝津出焉希水又南積而  
 為湖謂之希湖湖水又南流逕鞏縣東而南流注于江  
 是曰希口水者也然水流急濬霖雨暴疾漂濫無常行  
 者難之大江右岸有厭里口安樂浦從此至武昌尚方  
 作部諸屯相接枕帶長江又東得桑步步下有章浦本  
南陽郡治 全氏曰此地安得為南陽郡治或因下南陽山而譌先宗伯公曰當作西陽郡治是也  
 今悉荒蕪江水左得赤水浦夏浦也江水又東逕南陽  
 山南又曰芍嶼亦曰南陽嶼仲雍謂之南陽圻一名洛



水經注釋 江水三

至圻一名石姥水勢迅急江水又東逕西陵縣故城南

史記秦昭王遣白起伐楚取西陵者也漢章帝建初二

年封陰棠為侯國江水東歷孟家澇江之右岸有黃石

山水逕其北即黃石巖也一名石茨圻有西陵縣治也

縣北則三洲也山連徑江側東山偏高謂之西塞東對

黃公九巖所謂九圻者也於行小難兩山之間為闕塞

也從此濟於土瀘土瀘者北岸地名也

一清按方輿紀要與國州大治

又東過蕲春縣南蕲水從北東注之

江水右得葦口江浦也浦東有葦山江水東逕山北北

縣西塞山北即道土瀘也亦名土瀘

則土瀘者即土瀘也復與瀘通用

崖有東湖口江波左迤流結成湖故謂之湖口矣江水

又東得空石口江浦在右臨江有空石山南對石穴洲

洲上有蕲陽縣治也又東蕲水注之江水又東逕蕲春

縣故城南世祖建武三十年封陳俊子浮為侯國也江

水又東得銅零口江浦也大江右逕蝦蟆山北而東會

海口水南通大湖北達于江水左右翼山江水逕其北

東合臧口江浦矣江水又左逕長風山南得長風口江

浦也江水又東逕積布山南俗謂之積布巖又曰積布

圻庾仲雍所謂高山也此即西陽尋陽二郡界也右岸

有土瀘口江浦也夾浦有江山山東口有護江浦庾仲

雍謂之朝二浦也全氏曰朝二浦先宗伯公手校本作朝江浦即上護江浦之義

又東過下雒縣北利水從東陵西南注之

江水東逕琵琶山山下有琵琶灣也又東逕望夫山

南又東得苦菜水口夏浦也江之右岸富水注之水出

陽新縣之青湓山西北流逕陽新縣故豫章之屬縣矣

地多女鳥元中記曰新陽男子於水次得之遂與共居

生二女悉衣羽而去豫章間養兒不露其衣言是鳥落

塵於兒衣中則令兒病故亦謂之夜飛遊女矣一清按

要興國州永興廢縣下云本漢鄂縣及下雒縣地孫吳初為武昌縣地尋析武昌縣南境置陽新縣屬武昌郡晉以後因之隋改曰富川縣今猶謂之陽新里晉書地理志陽新屬武昌不屬豫章然吳書呂蒙傳云以尋陽

陽新為奉邑意者先屬豫章後更武昌乎且晉志又無新陽之名宋書州郡志竟陵太守屬有新陽男相殆是承初以後所置是注上云陽新下云新陽而所引毛女事搜神記作豫章新淦人則是又與陽新新陽俱無當也

又西北逕下雒縣王莽更名之潤光矣後併新陽全氏

日孫吳析下雒置陽新未嘗并下雒入新陽也水之左有公私裂漑咸成沃壤

舊吳屯所在也江水又東右得蘭溪水口並江浦也又

東左得青林口江水左傍青林湖即利水出廬江郡之

東陵鄉江夏有西陵縣故是言東矣尚書云江水過九

江至于東陵者也全氏曰按此則善長不以洞庭為九江以是知第四十卷九江在長沙下

雒之文非本經所有如以為經注互西南流水積為湖

湖西有青林山宋太始元年明帝遣沈攸之西伐子勛

伐柵青山觀一童子甚麗問伐者曰取此何為答欲討賊童子曰下句當平何勞伐此在眾人之中忽不復見

故謂之青林湖湖有鯽魚食之肥美辟寒暑湖水西流

謂之青林水又西南歷尋陽分為二水一水東流通大

雷一水西南流注于江經所謂利水也右對馬頭岸自

富口迤此五十餘里岸阻江山何氏曰此下注文總見

又曰三卷述大江源委即當繼以沔水蓋沔即漢江漢

同朝宗于海不可得而隔越也一清按義門之言非也

沔水篇兼敘北江自下雋以東所紀山水地名或瑣

貢錐指曰水經北江自下雋以東所紀山水地名或瑣

細難考沔水自石城以東尤多舛錯道元亦自謂未必

一得其實今據府州縣志附載其下水經注江水自西

塞山又東逕春縣故城南又東逕積布山南又東逕

下雋縣北又東逕春縣故城南又東逕積布山南又東逕

濟縣南又東逕德化縣北黃梅縣南彭蠡澤在德化縣

東南九十里其水北注于江此導江東迤北會于滙之

所經也江水又東北逕德化縣北與贛水合彭蠡湖從南來

注之江又東北逕望江縣北又東北逕流縣西其對岸則

對岸則宿松縣北逕望江縣北又東北逕流縣西其對岸則

懷甯縣又東北逕望江縣北又東北逕流縣西其對岸則

逕銅陵縣西又東北逕望江縣北又東北逕流縣西其對岸則

東北逕蕪湖縣西又東北逕望江縣北又東北逕流縣西其對岸則

東北逕蕪湖縣西又東北逕望江縣北又東北逕流縣西其對岸則

北其對岸則六合縣北其北岸則江浦縣北又東北逕流縣西其對岸則

北其對岸則六合縣北其北岸則江浦縣北又東北逕流縣西其對岸則

北其對岸則六合縣北其北岸則江浦縣北又東北逕流縣西其對岸則

北其對岸則六合縣北其北岸則江浦縣北又東北逕流縣西其對岸則

北其對岸則六合縣北其北岸則江浦縣北又東北逕流縣西其對岸則

北其對岸則六合縣北其北岸則江浦縣北又東北逕流縣西其對岸則

水經注釋卷三十五

江陰常熟及其境班氏所言之鄉漢時皆為毘陵縣地故大江入海在其境與中江南江並列而為三使枝幹不分石  
 江分江也而志與南江之更以爲南江使首尾橫決此則其  
 城分江入海之道也志更以爲南江使首尾橫決此則其  
 陽羨入海之道也志更以爲南江使首尾橫決此則其  
 所短耳水經依導水之序先居而後江沔水篇云與江  
 合流東過彭蠡澤又東北出居巢縣又東至石城縣與江  
 爲二其一過毘陵縣北出居巢縣又東至石城縣與江  
 而遺其北也過九水篇敘至下雒縣北東陵鄉之東北而  
 止以是應過九水篇敘至下雒縣北東陵鄉之東北而  
 貢之東陵也自是以下則以爲沔水同故不復見然  
 沔水篇但云過毘陵爲江北江而文則專敘南北江至陰  
 姚入海無一云過毘陵爲江北江而文則專敘南北江至陰  
 爲浙下卷故中誤及于東樵之言亦非也世本江陰  
 缺軼下卷故中誤及于東樵之言亦非也世本江陰  
 亡正繆欲爲酈氏洗此沈寃長夜復旦或庶幾焉寰宇  
 記舒州望江縣下引水經注云江水對雷山在縣南一  
 周瑜廟亦呼大雷神桐城縣下云江水對雷山在縣南一  
 漢書武帝紀元封五年巡狩過盛唐作樅陽盛唐俗謂之小  
 酈元注水經云此水源東南流逕盛唐作樅陽盛唐俗謂之小

唐雷水又名雷池水又云大雷池水西自宿松縣界流  
 入自發源縣界東南積而爲池謂之雷池又東流逕縣  
 南去縣百里又東入于海江行百里過雷池一步乃有  
 雷口晉庾亮報溫嶠書云西南歷尋陽分爲二雷一水  
 過大雷者也御覽引水經曰雷水南逕爲二雷一水東  
 江謂之大雷也雷口一派東南流入江謂之小雷口也  
 紀聞鮑明遠登大雷口也雷岸與大雷書大雷在舒州望  
 經注所謂大雷也雷池東晉有大雷書大雷在舒州望  
 積雨爲池謂之雷池也雷岸與大雷書大雷在舒州望  
 城縣下引注謂之雷池也雷岸與大雷書大雷在舒州望  
 流卽此處也太湖縣下引水經注云太湖在晉泰始二  
 在龍山太湖邊水出縣西積稻山東南流入江置縣  
 志廬江郡湖陽縣下云北湖在對岸初學記舒州引  
 湖與丹陽郡湖陽縣下云北湖在對岸初學記舒州引  
 水經注云破虜磯東有趙屯城內有倉寰宇記和州歷  
 陽縣注云洞浦魏將曹休屯城內有倉寰宇記和州歷  
 望注水經云洞浦魏將曹休屯城內有倉寰宇記和州歷  
 名洞浦初學記和州引水經注云洞浦魏將曹休屯城內有倉  
 豐浦上通湖池又云次得陰塘水同受皇後湖縣水連

爲復此湖縣南鄆溧湖各流注又史祭注得縣爲  
 東下也河一水漢八轉日治修云黃東包  
 田而流至經百道出志八酌舊之歷塘吳律四湖  
 中宣常銀里里里里里里里里里里里里里里  
 亦歛病林市即魯日陽陽陽陽陽陽陽陽陽陽  
 漸皆漂而中東陽陽陽陽陽陽陽陽陽陽陽陽  
 隘由沒所東達五湖縣陽陽陽陽陽陽陽陽陽  
 狹湖築謂黃堰也溧有應引水經注引水經注  
 故西銀中江東三湖縣南有支江顧城石曰  
 老出林五堰至陽羨卽此也蘇常承  
 云達于大以室之自是江不  
 當江以室之自是江不  
 時大以室之自是江不  
 慮江以室之自是江不  
 後江以室之自是江不  
 人江以室之自是江不  
 復江以室之自是江不  
 開江以室之自是江不  
 此江以室之自是江不

則蘇常之間必被水患遂以石室五堰路又液鐵以固  
 石故曰銀淋今訛爲林又云中江舊逕溧陽縣界古三  
 江之一今永陽江一名九陽江一名穎陽江在縣西北  
 三十五里卽其遺跡唐開元十七年蔣日用本縣城  
 隍記云此縣南歷中江橋梁之設助于此景福三年楊  
 創浮梁以便行旅中江橋梁之設助于此景福三年楊  
 行密將臺濠作五堰施輕舸饋糧是時中江置堰三年  
 亦旣狹矣東坡奏議云溧陽縣之西有五堰者古所以  
 節宣歙金陵九陽二江之眾水直趨之西有五堰者古  
 人販賣籐木東入二浙以五堰爲阻因給官中廢去五  
 堰五堰旣廢則宣歙金陵九陽二江之眾水直趨之西  
 宜興之荆溪由荆溪而成入震澤時元祐六年也是時  
 荆溪漫著其詳以見溧陽亦禹迹之復東惟承陽江水  
 邦憲作廣通壩考曰廣通壩在陽南湖受宣歙金世所  
 謂五堰者也西有固城石臼丹陽南湖受宣歙金世所  
 孰廣德及大江有固城石臼丹陽南湖受宣歙金世所  
 三五里頗高阜春秋時吳王闔廬伐楚用伍員計開渠  
 以運糧今尚名胥溪及傷有伍牙山云左傳襄公三年  
 楚子重伐吳克鳩兹至于衡山哀公十五年楚子西子  
 卷三十五

水經注釋卷三十五終  
期伐吳及桐汭蓋由此道鎮西有固城邑遺址則吳所  
以拒楚者也自是湖流相通東南連兩浙西入大江舟  
行無阻矣而漢唐以來言地理者遂以為水源本通蓋  
皆指吳所開為禹貢三江故道耳中江之彭澤聚在  
于羣籍者如此又漢志丹陽郡宛陵縣下云彭澤聚在  
西南清水西北至蕪湖入江在今甯國府界豈即清弋  
江乎說文冷水出丹陽宛陵西北入江冷水疑即清弋  
也而應劭乃移而屬之零陵郡冷水道縣下故臣瓚以為  
非也此水不見于  
江水注為附記之

水經注釋卷三十五終

海甯錢保塘  
華陽吳祖椿覆校

水經注釋卷三十六

仁和趙一清誠夫錄

青衣水

桓水

若水

沫水

延江水

存水

溫水

青衣水出青衣縣西蒙山東與沫水合也

縣故古青衣羌國也竹書紀年梁惠成王十年瑕陽人  
自秦導岷山青衣水來歸漢武帝天漢四年分沈黎郡  
置西部都尉治青衣主漢民公孫述之有蜀也青衣不  
服世祖嘉之建武十九年以為郡安帝延光元年置蜀  
郡屬國都尉青衣王子心慕漢制上求內附順帝陽嘉

二年改曰漢嘉嘉得此良臣也縣有蒙山青衣水所發

東逕其縣與沫水會於越巂郡之靈關道漢嘉之靈關

山非越巂郡之靈關道也道元蓋為經所誤詳沫水篇 青衣水又東即水注之水

出漢嘉巖道即來山東至蜀郡臨邛縣東入青衣水

至犍為南安縣入于江

青衣水逕平鄉謂之平鄉江益州記曰平鄉江東逕峨

眉山在南安縣界去成都南千里然秋日清澄望見兩

山相峙如峨眉焉青衣水又東流注于大江

桓水出蜀郡岷山西南行羌中入于南海

尚書禹貢岷嶓既藝沱潛既道蔡蒙旅平和夷底績鄭

元曰和上夷所居之地也和讀曰桓地理志曰桓水出

蜀郡蜀山西南行羌中者也尚書又曰西傾因桓是來

馬融王肅云西治傾山唯因桓水是來言無他道也余

按經據書岷山西傾俱有桓水桓水出西傾山更無別

流所導者唯斯水耳禹貢錐指曰古者桓有和音故鄭

自桓水以南為夷書所謂和夷底績此說是一水行羌中

破和為桓耳又曰漢志蜀郡下桓水別是一水行羌中

入南海不復經中國班氏指為禹貢之桓水何其繆也

酈道元云岷山西傾俱有桓水此亦為班孔作調人耳

依鄭說其所指者當為漢志之泝水唐之大渡河而謂

此水即西傾所因之桓水大非釋桓水者當以酈注所

敘之白浮於潛漢而達江河故晉地道記曰梁州南至

桓水西底黑水東限并關今漢中巴郡汶山蜀郡漢嘉

江陽朱提涪陵陰平廣漢新都梓潼犍爲武都上庸魏興新城皆古梁州之地自桓水以南爲夷書所謂和夷底績也然所可當者惟斯水與江耳桓水蓋二水之別名爲兩江之通稱矣鄭元注尙書言織皮謂西戎之國也西傾雍州之山也雍戎二野之間人有所事於京師者道當由此州而來桓是隴坂名其道盤桓旋曲而上故名曰桓是今其下民謂是坂曲爲盤也斯乃元之別致恐乖尙書因桓之義非浮潛入渭之文余考校諸書以具聞見今略緝綜川流沿注之緒雖今古異容本其流俗粗陳所由然自西傾至葭萌入于西漢卽鄭元之所

謂潛水者也自西漢溯流而屆于晉壽界沮漾枝津南歷岡穴迤邐而接漢沿此入漾書所謂浮潛而逾沔矣歷漢川至南鄭縣屬于褒水溯褒暨于衙嶺之南溪水支灌于斜川屆于武功而北達于渭水此乃水陸之相關川流之所經復不乖禹貢入渭之宗實符尙書亂河之義也禹貢錐指曰酈元云自西漢沔流而至晉壽沮漾枝津南枝津卽郭璞所云水從沔陽縣南流至漢壽寔字記所謂三泉故縣南大寒水西流者也歷岡穴迤邐而接漢岡穴卽郭璞所謂峒山括地志所謂龍門山大石穴者也又曰水經注以褒斜二水爲自沔入渭之道考諸漢史則猶有可疑者河渠書云武帝時有上書欲通褒斜道及漕事下御史大夫張湯湯問之言抵蜀從故道故道多阪回遠今穿褒斜道少阪近四百里而褒水通沔斜水通渭皆可以行船漕從南陽上沔入褒褒絕水至斜間百餘里以車轉從斜下渭



水經注釋 恒水 若水  
如此漢中之穀可致山東從沔無限便于底柱之漕上  
以爲然拜湯子印爲漢中守發數萬人作褒斜道五百  
餘里道果便近而水多湍石不可漕蘇氏據此以說經  
日沔無入渭之道漢人所言褒斜則其道也然褒斜之  
謂褒斜水百餘里故曰逾于沔蓋禹時通謂褒爲沔也竊  
之南溪水支灌于斜川者及夏殷之際梁俗變爲蠻夷  
貢職不修貢道遂廢周武王牧野之際八國雖嘗來會  
其後巴蜀恃險復不與中國通逾沔入渭之道其誰知  
之嘗觀江河之枝流日久亦多墜塞而況深山窮谷之  
中溪流一線裁得通舟自禹至漢多歷年所豈能長存  
而不變褒斜二水相通之道禹時自有漢時自無不得  
據漢史而疑聖經亦不  
得據酈注而疑漢史也

若水出蜀郡旄牛徼外東南至故關爲若水也

山海經曰南海之內黑水之間有木名曰若木若水出焉又云灰野之山有樹焉青葉赤華厥名若木生崑崙

山西附西極也淮南子曰若木在建木西木有十華其  
光照下地故屈原離騷天問曰羲和未陽若華何光是  
也然若木之生非一所也黑水之間厥木所植水出其  
下故水受其稱焉若水沿流閒關蜀土黃帝長子昌意  
德劣不足紹承大位降居斯水爲諸侯焉娶蜀山氏女  
生顓頊於若水之野有聖德二十登帝位承少皞金官  
之政以水德膺歷矣若水東南流鮮水注之一名州江  
大渡水出徼外至旄牛道南流入于若水一清按漢志蜀郡旄牛鮮  
水出徼外南入若水旄牛不日道續志亦不日道與注異也又逕越嶲大花縣入繩  
繩水出徼外山海經曰巴遂之山繩水出焉東南流分

水經注釋 卷三十六

四

為二水其一水枝流東出逕廣柔縣東流注于江其一

水南逕旄牛道至大茆與若水合自下亦通謂之為繩

水矣一清按漢志越嶲郡遂久縣繩水出徼外東至焚道入江過郡二行千四百里說文從水作灑詳本篇

入江注中越嶲道縣茆夷也汶山曰夷南中曰昆彌蜀曰邛漢嘉

越嶲曰茆皆夷種也一清按禹貢錐指曰凡言茆者夷人於大江水上置藤橋謂之茆定

南過越嶲邛都縣西直南至會無縣淹水東南流注之

邛都縣漢武帝開邛茆置之縣陷為池今因名為邛池

南人謂之河一清按漢志越嶲邛都縣下云南山出銅有邛池澤范史西南夷傳云南人以爲邛

河劉昭補註郡國志引南中志曰邛都縣東南數里有

水名邛廣都河從廣三十里深百餘丈有魚長一二丈

頭特大遙視如戴鐵釜狀河中有蟀嶺山有嶺水言越此水以章休

盛也後復反叛元鼎六年漢兵自越嶺水伐之一清按有嶺水

言越此水以章休盛說本應劭漢書音義然漢書西南夷傳又作粵嶺粵與越通猶百粵之為百越揚越之稱

揚粵耳則越嶺二字相連仲瑗之說大抵附會道元引之非也以為越嶺郡治邛都縣

王莽遣任貴為領戎大尹守之更名為集嶺也縣故邛

都國也越嶺水即繩若矣似隨水地而更名矣又有溫

水冬夏常熱其源可燂雞豚下湯沐洗能治宿疾昔李

驤敗李流於溫水是也若水又逕會無縣縣有駿馬河

水出縣東高山山有天馬徑厥跡存焉馬日行千里民

家馬牧之山下或產駿駒言是天馬子河中有貝子胎

銅以羊祠之則可取也又有孫水焉水出臺高縣即臺登縣也孫水一名白沙江南流逕邛都縣司馬相如定

西南夷橋孫水即水也又南至會無入若水一清按漢志越

無入若行七百五十里若水又南逕雲南郡之遂久

縣蜻蛉水入焉水出蜻蛉縣西東逕其縣下縣以氏焉

有石豬圻長谷中有石豬子母數千頭長老傳言夷昔

牧此一朝化為石迄今夷人不敢往牧貪水出焉蜻蛉

水又東注于繩水一清按漢志注應劭繩水又逕三絳

縣西又逕姑復縣北對三絳縣淹水注之三絳一曰小

會無故經曰淹至會無注若水全氏曰按越嶲原有會無經之所指乃三絳縣

故善長若水又與母血水合水出益州郡弄棟縣東農

山母血谷北流逕三絳縣南北入繩一清按漢志益州

之牧靡縣南山縣山竝即草以立名山在縣東北烏句

山南五百里山生牧靡草可以解毒百卉方盛鳥多誤

食烏喙中毒必急飛往牧靡山喙牧靡以解毒也朱氏

箋曰李奇曰牧靡即升麻也涂水導源臈谷西北流至越嶲入繩一

過郡二行千二百里今本漢書落谷字當以水經注補

之繩水又逕越嶲郡之馬湖縣謂之馬湖江又左合卑

水縣一清按漢志越嶲郡卑水縣孟康曰音班劉昭而

水經主壘 卷三十六 六

東流注馬湖江也

一清按漢志越巂諸水皆與注合惟蘇示縣下云尼江在西北獨無可考

耳

又東北至犍為朱提縣西瀘江水注之

朱提山名也應劭曰在縣西南縣以氏焉犍為屬國也在郡南千八百許里建安二十年立朱提郡郡治縣故城郡西南二百里得所綰堂琅縣西北行上高山羊腸繩屈八十餘里或攀木而升或繩索相牽而上緣陟者若將階天故袁休明巴蜀志云高山巖峩巖石磊落傾側縈迴下臨峭壑行者扳緣牽援繩索三蜀之人及南中諸郡以為至險有瀘津東去縣八十里水廣六七百

步深十數丈多瘴氣鮮有行者晉明帝大甯二年李驥

等侵越巂攻臺登縣甯州刺史王遜遣將軍姚岳

書王遜傳擊之戰於堂琅驤軍大敗岳追之至瀘水赴

水死者千餘人遜以岳等不窮追怒甚髮上衝冠帽裂

而卒案永昌郡有蘭倉水出西南博南縣漢明帝永平

十二年置

一清按郡國志博南山名也縣以氏之其水

東北流出博南山漢武帝時通博南山道渡蘭倉津土

地絕遠行者苦之歌曰漢德廣開不賓渡博南越倉津

渡蘭倉為作人

一清按作人猶役徒也而華陽國志作

讀去聲唐書張柬之傳引此山高四十里蘭倉水出金

水經主釋

卷三十六

七

沙越人收以爲黃金又有珠光穴穴出光珠又有琥珀  
珊瑚黃白青珠也蘭倉水又東北逕不韋縣與類水合  
水出嶠唐縣漢武帝置類水西南流曲折又北流東至  
不韋縣注蘭倉水一清按漢志益州郡嶠唐縣類水西南至不韋行六百五十里又東  
與禁水合水自永昌縣而北逕其郡西水左右甚饒犀  
象山有鉤蛇長七八丈尾末有岐蛇在山澗水中以尾  
鉤岸上人牛食之此水傷瘴氣特惡氣中有物不見其  
形其作有聲中木則折中人則害名曰鬼彈惟十一月  
十二月差可渡正月至十月經之無不害人故郡有罪  
人徙之禁傷不過十日皆死也禁水又北注瀘津水又

東逕不韋縣北而東北流兩岸皆高山數百丈瀘峯最  
爲傑秀孤高三千餘丈是山於晉太康中崩震動郡邑  
水之左右馬步之徑裁通而時有瘴氣三月四月經之  
必死非此時猶令人悶吐五月以後行者差得無害故  
諸葛亮表言五月渡瀘并日而食臣非不自惜也顧王  
業不可偏安於蜀故也益州記曰瀘水源出曲羅嶠下  
三百里曰瀘水兩峯有殺氣暑月舊不行故武侯以夏  
渡爲艱瀘水又下合諸水而摠其目焉故有瀘江之名  
矣自朱提至夔道有水步道有黑水羊官水至嶮難三  
津之阻行者苦之故俗爲之語曰檣溪赤木盤蛇七曲

盤羊烏橐氣與天通看都濩泚住柱呼伊庾降賈子左  
檐七里又有牛叩頭馬搏頰坂其艱險如此也

又東北至棘道縣入于江

若水至棘道縣又謂之馬湖江繩水瀘水孫水淹水大  
渡水隨決入而納通稱是以諸書錄記羣水或言入若  
又言注繩亦或言至棘道入江正是異水沿注通為一  
津更無別川可以當之水有孝子石昔縣人有隗叔通  
者性至孝為母汲江膺水天為出平石至江膺中今猶  
謂之孝子石可謂至誠發中而休應自天矣

沫水出廣柔徼外

縣有石紐鄉禹所生也今夷人共營之地方百里不敢  
居牧有罪逃野捕之者不逼能藏三年不為人得則其  
原之言大禹之神所祐之也

東南過旄牛縣北又東至越雋靈道縣出蒙山南

靈道縣一名靈關道漢制夷狄曰道禹貢錐指曰漢靈

此地甚遠今盧山縣西北有靈關廢縣通典雅州盧山  
縣有靈關山是也其地當為沫水之所經蓋漢後別置  
宋書符瑞志云晉咸甯三年黃龍見漢嘉靈關則縣屬  
漢嘉之靈關非越雋之靈關道也經注並誤一清按靈  
史記作零寰宇記雅州盧山縣下云靈關鎮在縣北入  
十二里四向峻峻控帶蕃蠻一夫守之可以禦百蜀都  
賦云廓靈關而為門注云關為西南漢嘉郡界也又云  
靈關山在縣北二十里峯嶺巖巖山聳十里傍夾大路  
下有山峽口闊三丈長二百步俗呼為縣有銅山又有  
重關通蠻貊之鄉入白狼夷之境是也

水經注卷之三十六

利慈渚晉太始九年黃龍二見于利慈縣令董元之率吏民觀之以白刺史王濬濬表上之晉朝改護龍縣也沫水出岷山西東流過漢嘉郡南流衝一高山山上合下開水逕其間山即蒙山也

東北與青衣水合

華陽國志曰二水於漢嘉青衣縣東合為一川自下亦謂之為青衣水沫水又東逕開邦縣故平鄉也晉初置沫水又東逕臨邛南而東出于江原縣也

東入于江

昔沫水自蒙山至南安為溷崖水脈漂疾破害舟船歷

代為患蜀都太守李冰發卒鑿平溷崖河神鬣怒冰乃

操刀入水與神鬣遂平溷崖通正水路開處即冰所穿

也一清按溷崖即江水篇之熊耳峽也續志鬣為郡南安縣有魚泣津劉昭補注蜀都賦注曰魚符津數百

步在縣北三十里縣臨大江岸便山嶺相連經益州郡有道廣四五尺深或百丈鑿鑿之迹今存昔唐蒙所造然則溷崖之闢為李冰始事而成于唐蒙也范史吳漢傳章懷注引續志作魚涪津又曰魚鳧津寰宇記引南

延江水出犍為南廣縣又東至犍柯營縣東屈北流

營縣故犍為郡治也一清按兩漢晉宋諸志俱不云犍為郡治營且營屬犍柯已見經文

善長注自縣有犍山晉建興元年置平夷郡縣有營水

出營邑西不狼山東與溫水合溫水一曰煖水出犍為

水經注卷之三十六

水經注釋 涿水 延江水

符縣而南入黠水黠水亦出符縣南與溫水會闕駟謂之闕水俱南入營水營水於其縣而東注于延江水全氏

日按漢志犍為郡符縣溫水南至營入黠水黠水亦南至營入江梓柯郡營縣不狼山營水所出東入沅過郡二行七百三十里今以是注考之蓋溫入黠黠入延延入沅以入江也說文溫水出涪南入黔水黔字誤當作黠然善長所引卻不延江水又與漢水合水出犍為漢錯蓋流俗本之失也

陽道王莽之新通也山關谷東至營邑入延江水也清

按漢志犍為郡漢陽縣都尉治山關谷漢水所出東至營入延漢陽不云是道續志之犍為屬國晉志之朱提郡下亦無道字漢志續志營是縣非邑也二縣注並與史異

至巴郡涪陵縣注更始水

更始水即延江枝分之始也延江水北入涪陵水涪陵

水出縣東故巴郡之南鄙王莽更名巴亭魏武分巴邱

為涪陵郡朱氏謀璋箋曰晉書地理志蜀置涪陵郡今云魏武分所未詳也全氏曰晉志又云涪陵是劉璋置劉璋之末巴郡入于張魯魯降曹氏更入魏因置三巴見于魏書則魏或嘗立涪陵郡未可知也特史志不詳耳張堪為縣會公孫述擊堪同心義士選習水者

筏渡堪於小別江即此水也其水北至枳縣入江更始水東入巴東之南浦縣其水注引瀆水石門空岫陰深邃澗閣密傾崖上合恆有落勢行旅避瘴將有遷之無不危心於其下又謂之西鄉水亦謂之西鄉溪溪水間關二百許里方得出山又通波注遠復二百餘里東南入遷陵縣也



九經注釋 延江水

又東南至武陵酉陽縣入于酉水

武陵先賢傳曰潘京世長為郡主簿太守趙偉甚器之問京貴郡何以名武陵京答曰鄙郡本名義陵在辰陽縣界與夷相接數為所破光武時移治東山之上遂爾易號傳曰止戈為武詩云高平曰陵於是名焉一清按劉昭補注郡國志曰前書本名武陵不知此對何所據而出酉水北岸有黠陽縣許慎曰溫水南入黠蓋管水以下津流沿注之通稱也故縣受名焉西鄉溪口在遷陵縣故城上五十里左合酉水酉水又東際其故城北又東逕酉陽故縣南而東出也兩縣相去水道可四百許里於酉陽合也酉水東南至沅

陵縣入于沅

一清按酉水源流詳具沅水篇而俗本日錄作沅酉水已是不合所存卷中僅此經文而注無一字全氏曰此是延江水篇注結語後人妄分之耳何焯亦云酉水入沅當附沅水篇但酉水出充縣明見漢志而應劭于酉陽縣以為酉水所出誤也善長云東逕酉陽則善矣蓋酉水自充縣至此始與延江水合也應劭又曰東入湘亦誤今經文既改隸而其目亦削去焉存水出犍為郁郾縣全氏曰按水經皆用東漢郡縣名獨所并作經時其縣尚在與天水隆慮同一例也

王莽之孱郾也益州大姓雍闓反結壘於山繫馬柳柱柱生成林今夷人名曰雍無梁林梁夷言馬也周水自縣東南流逕牧靡縣北又東逕且蘭縣北而東南出也東南至鬱林定周縣為周水

水經注釋 存水 溫水

周水又東逕牂柯郡之母斂縣北而東南與母斂水合

矣水首受牂柯水東逕母斂縣為母斂水又東注于存

水存水又東逕鬱林定周縣為周水蓋水變名也

按漢志益州郡鬱唐縣周水首受微外又鬱林郡定周縣水首受母斂東入潭行七百九十里蓋自微外合母斂水潭也

又東北至潭中縣注于潭

溫水出牂柯夜郎縣

縣故夜郎侯國一清按漢志應劭注作邑也唐蒙開以為縣王莽名

曰同亭矣溫水自縣西北流逕談藁與逝水合水西出

益州郡之銅瀨縣談虜山東逕談藁縣右注溫水溫水

又西逕昆澤縣南又逕味縣縣故滇國都也諸葛亮討

平南中劉禪建興元年分益州郡置建甯郡於此

按清葛南征在建興三年不得有元年置郡事也元字誤當作三字水側皆是高山山水之

間悉是木耳夷居語言不同嗜欲亦異雖曰山居士差

平和而無瘴毒溫水又西南逕滇池於縣西北池周三

百許里上源深廣下流淺狹似如倒流故曰滇池也

按漢志益州郡滇池縣滇池澤在西北有黑水祠長老傳言池中有神馬家馬

交之則生駿駒日行五百里晉太元十四年甯州刺史

費統言晉甯郡滇池縣兩神馬一白一黑盤戲河水之

上有滇州元封三年立益州郡治滇池劉禪建甯郡治

也溫水又西會大澤一清按漢志益州郡滇池縣大澤在西與葉榆僕水

合溫水又東南逕牂柯之母單縣建興中劉禪割屬建

甯郡橋水注之水上承俞元之南池一清按漢志益州郡俞元縣池在南

甯郡橋水注之水上承俞元之南池一清按漢志益州郡俞元縣池在南

水一清按漢志益州郡勝休縣河水東至與邪龍分浦

後立河陽郡治河陽縣縣在河源洲上又有雲平縣並

在洲中橋水東流逕母單縣注于溫溫水又東南逕興

古郡之母椽縣東王莽更名有椽也與南橋水合水出

縣之橋山一清按漢志益州郡母椽縣橋水首受橋山

善長以為南橋蓋以別于俞元之橋也全氏曰按善長

既加南字以別之矣然南橋水固河水之所入也又謂

俞元之橋一名河水則二東流梁水注之梁水上承河

橋互相出入矣恐有誤

水於俞元縣而東南逕興古之勝休縣王莽更名勝熨

縣梁水又東逕母椽縣左注橋水橋水又東注于溫溫

水又東南逕律高縣南劉禪建興三年分牂柯置興古

郡治宛溫縣晉書地道記治此溫水又東南逕梁水郡

南溫水上合梁水故自下通得梁水之稱是以劉禪分

興古之監南置郡于梁水縣也一清按宋志梁水太守

縣與郡俱立此云蜀置晉成帝分興古立梁水

蓋東晉復立此郡也溫水又東南逕鐔封縣北又逕

來唯縣東而僕水右出焉

又東至鬱林廣鬱縣為鬱水

秦桂林郡也漢武帝元鼎六年更名鬱林郡王莽以為鬱平郡矣應劭地理風俗記曰周禮鬱人掌裸器凡祭醑賓客之裸事和鬱鬯以實樽彝鬱芳草也百草之華煮以合釀黑黍以降神者也或說今鬱金香是也一曰鬱人所貢因氏郡矣溫水又東逕增食縣有文象水注之其水導源牂柯句町縣應劭曰故句町國也王莽以為從化文象水蒙水與盧唯水來細水伐水並自縣東歷廣鬱至增食縣注于鬱水也全氏曰漢志牂柯郡句町縣文象水東至增食入鬱又有盧唯水來細水伐水而蒙水獨無稱又鬱林郡下云有小谿水七并行三千一百一十里

又東至領方縣東與斤南水合全氏曰按斤南即漢志之斤員宋祁曰一作斤南者

也經又別稱斤江又曰員水者是

縣有朱厓水出臨塵縣東北流驩水注之水源上承牂

柯水東逕增食縣而下注朱厓水一清按漢志鬱林郡增食縣驩水首受牂

柯東界入朱厓水行五百七十里朱厓水又東北逕臨塵縣王莽之監

塵也縣有斤員水侵離水全氏曰四十卷末作侵黎並逕臨塵東入

領方縣流注鬱水一清按漢志鬱林郡臨塵縣朱厓水入領方又有侵離水行

七百里領方縣斤員水入鬱

東北入于鬱

鬱水即夜郎豚水也一清按漢志鬱林郡廣鬱縣鬱水首受夜郎豚水牂柯郡夜郎縣豚

水東至廣鬱然則鬱水非即豚水矣苑史西南夷漢武傳作遜水章懷注引前書地理志亦作遜水也

帝時有竹王興于豚水有一女子浣于水濱有三節大竹流入女子足間推之不去聞有聲持歸破之得一男兒遂雄夷濮氏竹為姓所捐破竹於野成林今竹王祠竹林是也王嘗從人止大石上命作羹從者白無水王以劍擊石出水今竹王水是也後唐蒙開牂柯斬竹王首夷獠咸怨以竹王非血氣所生求為立嗣帝封三子為侯及死配父廟今竹王三郎祠其神也豚水東北流逕談藁縣東逕牂柯郡且蘭縣謂之牂柯水水廣數里縣臨江上故且蘭侯國一清按漢志應劭注作邑也一名頭蘭牂柯郡治也楚將莊躡泝沅伐夜郎徑牂柯繫船因名且蘭

為牂柯矣漢武帝元鼎六年開王莽更名同亭有柱蒲關牂柯亦江中兩山名也左思吳都賦云吐浪牂柯者也元鼎五年武帝伐南越發夜郎精兵下牂柯江同會番馬是也一清按漢志牂柯郡下應劭曰臨牂柯江也師古曰牂柯係船也華陽國志曰楚頃襄王時遣莊躡伐夜郎軍至且蘭椽船于岸而步戰既滅夜郎且蘭有椽船牂柯處乃改名為牂柯水又東南逕母斂縣西母斂水出焉又東驩水出焉又逕鬱林廣鬱縣為鬱水又東北逕領方縣北又東逕布山縣北鬱林郡治也吳陸績謂子績曰從今以後六十年車同軌書同文何氏曰據吳志此是績語未知臆據何書且績父康裴注引謝承書曰康字季甯拜廬江太守不名緒也至太康元年晉果平吳又逕中雷縣南

與溫水合又東入阿林縣潭水注之水出武陵郡鐔成  
 縣玉山東流逕鬱林郡潭中縣周水自西南來注之潭  
 水又東南流與剛水合水西出牂柯母斂縣王莽之有  
 斂也東至潭中縣入潭道一清按此段注水潭水又逕中  
 雷縣東阿林縣西右入鬱水縣一清按漢志武陵郡鐔成  
 林入鬱過郡二地理志曰橋水東至中雷入潭又云領  
 行七百二十里故兼通稱作者咸言至中雷入潭潭水又得鬱之兼稱  
 而字當為南南橋水也蓋書字誤矣全氏曰漢志橋水  
 郡有一三橋水各為源流善長既以俞元之橋混入母  
 椽之橋茲又以母椽之橋混入領方之橋一清按漢志

鬱林郡領方縣下云又有橋水是又字不是而字亦是  
 橋字从土不从木師古曰橋音橋善長即混而一之而  
 于下文又出嶠水則以萌渚嶠為名何也然鬱水右則  
 則南橋水之名直是繆詞豈所見有別本耶鬱水右則  
 雷水注之水南出布山縣下逕中雷入潭一清按漢志  
 縣師古曰雷音力救反水潭水東逕阿林縣又東逕猛  
 名說文雷水出鬱林郡陵縣浪水注之又東逕蒼梧廣信縣灘水注之鬱水又  
 東封水注之出臨賀郡馮乘縣西謝沐縣東界牛屯山  
 亦謂之臨水東南流逕萌渚嶠西又東南左合嶠水庾  
 仲初云水出萌渚嶠南流入于臨臨水又逕臨賀縣東  
 又南至郡左會賀水水出東北興安縣西北有羅山東  
 南流逕興安縣西盛宏之荊州記云興安縣水邊有平

石上有石履言越王渡溪脫履於此賀水又西南流至

臨賀郡東右注臨水郡對二水之交會故郡縣取名焉

臨水又西南流逕郡南又西南逕封陽縣東為封谿水

故地理志曰縣在封水之陽一清按此是應劭注非班固原文又西南

流入廣信縣南流注于鬱水謂之封谿水口者也按續

志交趾郡封谿縣建武十九年置劉昭補注引交州記曰有隄防龍門水深百尋大魚登此門化成龍不得過

曝鰓點額血流此水極如丹池有秦潛江出鬱水又東

輻山分為九十九流三百餘里共合一口

逕高要縣牢水注之水南出交州合浦郡治合浦縣漢

武帝元鼎六年平越所置也王莽更名曰桓合縣曰桓

亭孫權黃武七年改曰珠官郡郡不產穀多採珠寶前

政煩苛珠徙交趾會稽孟伯周為守有惠化去珠復還

郡統臨允縣王莽之大允也牢水自縣北流逕高要縣

入于鬱水一清按漢志合浦郡臨允郡下云牢水北入高要入鬱過郡三行五百三十里鬱水

南逕廣州南海郡西浪水出焉又南右納西隨三水全

日按西隨三水即葉榆水篇所謂西隨水過交趾分為五水至東界復為三水者也又南逕四會

浦水上承日南郡盧容縣西古郎究浦內浦口馬援所

漕水東南屈曲通郎湖湖水承金山郎究究水北流左

會盧容壽冷二水盧容水出西南區粟城南高山而東

逕區粟城北又東右與壽冷水合水出壽冷縣界魏正

始九年林邑進侵至壽冷縣以為疆界即此縣也壽冷

縣以水湊故水得其名東逕區粟城南考古志並無區粟之名應劭地理風俗記曰日南故秦象郡漢武帝元鼎六年間日南郡治西捲縣林邑記曰城去林邑步道四百餘里交州外域記曰從日南郡南去到林邑國四百餘里準徑相符然則城故西捲縣也地理志曰水入海有竹可爲杖王莽更之曰日南亭林邑記曰其城治二水之間三方際山南北瞰水東西澗浦流湊城下城西拆十角周圍六里一百七十步東西度六百五十步塼城二丈上起塼牆一丈開方隙孔塼上倚板板上五重層閣閣上架屋屋上架樓樓高者七八丈下者五六

丈城開十三門凡宮殿南向屋宇二千一百餘閒市居周繞岨峭地險故林邑兵器戰具悉在區粟多城壘自林邑王范胡達始秦餘徙民染同夷化日南舊風變易俱盡巢棲樹宿負郭接山榛棘蒲薄騰林拂雲幽煙冥緬非生人所安區粟建八尺表日影度南八寸自此影以南在日之南故以名郡望北辰星落在天際日在北故開北戶以向日此其大較也范泰古今善言曰日南張重舉計入洛正旦大會明帝問日南郡北向視日也重曰今郡有雲中金城者不必皆有其實日亦俱出於東耳至于風氣暄暖日影仰當官民居止隨情面向東



西南北迴背無定人性凶悍果於戰鬪便山習水不閑平地古人云五嶺者天地以隔內外况縣途於海表顧九嶺而彌邈非復行路之逕阻信幽荒之冥域者矣壽冷水自城西南與盧容水合東注郎究究水所積下潭爲湖謂之郎湖浦口有秦時象郡墟域猶存自湖南望外通壽冷從郎湖入四會浦元嘉二十年以林邑頑凶歷代難化恃遠負眾慢威背德北寶旣臻南金闕貢乃命偏將與龍驤將軍交州刺史檀和之陳兵日南修文服遠二十三年揚旌從四會浦口入郎湖軍次區粟進逼圍城以飛梯雲橋懸樓登壘鉦鼓大作虎士電怒風

烈火揚城摧衆陷斬區粟王范扶龍首十五以上戮截無赦樓閣兩血填尸成觀自四會南入得盧容浦口晉太康三年省日南郡屬國都尉以其所統盧容縣置日南郡及象林縣之故治晉書地道記曰郡去盧容浦口二百里故秦象郡象林縣治也永和五年征西桓溫遣督護滕峻率交廣兵伐范文於舊日南之盧容縣爲文所敗卽是處也退次九真更治兵交被創死子佛代立七年峻與交州刺史楊平復進軍壽冷浦入頓郎湖討佛于日南故治佛蟻聚連壘五十餘里峻平破之佛逃窟川藪遣大帥面縛請罪軍門遣武士陳延勞佛與盟

而還康泰扶南記曰從林邑至日南盧容浦口可二百餘里從口南發往扶南諸國常從此口出也故林邑記曰盡紘滄之徼遠極流服之無外地濱滄海衆國津逕鬱水南通壽洽卽一浦也浦上承交阯郡南都官塞浦林邑記曰浦通銅鼓外越安定黃岡心口蓋藉度銅鼓卽越駱也有銅鼓因得其名馬援取其鼓以鑄銅馬至鑿口馬援所鑿內通九真浦陽晉書地道記九德郡有浦陽縣交州記曰鑿南塘者九真路之所經也去州五百里建武十九年馬援所開林邑記曰外越紀粟望都一清按此處似缺一字紀粟出浦陽渡便州至典由渡故縣至咸

驩咸驩屬九真咸驩已南麀鹿滿岡嗚咆命疇警嘯聒野孔雀飛翔蔽日籠山渡治口至九德按晉書地道記有九德縣交州外域記曰九德縣屬九真郡在郡之南與日南接蠻盧輦居其地死子寶綱代孫黨服從吳化定爲九德郡又爲隸之林邑記曰九德九夷所極故以名郡郡名所置周越裳氏之夷國周禮九夷遠極越裳自雉象牙重九譯而來自九德通類口水源從西北遠荒逕甯州界來也九德浦內逕越裳究九德究南陵究按晉書地道記九德郡有南陵縣晉置也竺芝扶南記山溪瀨中謂之究地理志曰郡有小水五十二并行大

川皆究之謂也

一清按漢志九真郡下云有小水林邑五十二并行入千五百六十里

記曰義熙九年交阯太守杜慧度造九真水口與林邑

王范胡達戰擒斬胡達二子虜獲百餘人胡達限

按此處有脫文蓋言胡達保險自固也五月慧度自九真水歷都粟浦復襲

九真長圍跨山重柵斷浦驅象前鋒接刃城下連日交

戰殺傷乃退地理志曰九真郡漢武帝元鼎六年開治

胥浦縣王莽更之曰驩成也晉書地道記曰九真郡有

松原縣林邑記曰松原以西鳥獸馴良不知畏弓寡婦

孤居散髮至老南移之嶺翠不踰仞倉庚懷春於其北

翡翠熙景乎其南雖愛謹接響城隔殊非獨步難遊俗

姓塗分故也自南陵究出于南界蠻進得橫山太和三

年范文侵交州於橫山分界度比景廟由門浦至古戰

灣吳赤烏十一年魏正始九年全氏曰五字注中注交州與林邑

於灣大戰初失區粟也渡盧容縣日南郡之屬縣也自

盧容縣至無變越烽火至比景縣日中頭上影當身下

與影為比如渟曰故以比影名縣闕駟曰比讀蔭庇之

庇影在已下言為身所庇也全氏曰吳仁傑曰考古編云舊唐志景州北景縣晉

將灌遠破林邑五月五日即其地立表在北日景在

南故郡名日南縣為北景按唐命太史往安南測日景

亦云然然王充謂從日南還者問之曰不盡然蓋惟五

月日影在南常時則不然也按水經比景縣音莠影言

影為身所庇此爾雅所謂距齊州以南戴日者也宋書

州郡志亦作北景蓋後來傳習成訛立為異義耳斗南

以此景為北景豈所見前後漢志有別本與林邑記曰度比景至朱吾朱吾

縣浦今之封界朱吾以南有文狼人野居無室宅依樹止宿食生魚肉採香為業與人交市若上皇之民矣縣南有文狼究下流逕通晉書地道記曰朱吾縣屬日南郡去郡二百里此縣民漢時不堪二千石長吏調求引屈都乾為國林邑記曰屈都夷也朱吾浦內通無勞湖無勞究水通壽冷浦元嘉元年交州刺史阮彌之征林邑楊邁出婚不在奮威將軍阮謙之領七千人先襲區粟已過四會未入壽冷三日三夜無頓止處凝海直岸遇風大敗楊邁攜婚都部伍三百許船來相救援謙之

遭風餘數船艦夜於壽冷浦裏相遇閭中大戰謙之手射楊邁施工船敗縱橫崑崙單舸接得楊邁謙之以風溺之餘制勝理難自此還渡壽冷至溫公浦升平三年溫放之征范佛於灣分界陰陽圻入新羅灣至焉下一名阿賁浦入彭龍灣隱避風波即林邑之海渚元嘉二十三年交州刺史檀和之破區粟已飛旂蓋海將指典冲於彭龍灣上鬼塔與林邑大戰還渡典冲林邑入浦令軍大進持重故也浦西即林邑都也治典冲去海岸四十里處荒流之微表國越裳之疆南秦漢象郡之象林縣也東濱滄海西際徐狼南接扶南北連九德後去

象林林邑之號建國起自漢末初平之亂人懷異心象林功曹姓區有子名連一清按梁書作達攻其縣殺令自號爲王值世亂離林邑遂立後乃襲代傳位子孫三國鼎爭未有所附吳有交土與之鄰接進侵壽洽以爲疆界自區連以後國無文史失其纂代世數難詳宗允滅絕無復種裔外孫范熊代立人情樂推後熊死子逸立有范文日南西捲縣夷帥椎家奴也文爲奴時山澗牧羊於澗水中得兩鱧魚隱藏挾歸規欲私食郎知檢求文大慙懼起託云將礪石還非爲魚也郎至魚所見是兩石信之而去文始異之石有鐵文入山中就石冶鍊鍛作

兩刀舉刀向鄣因祝曰鱧魚變化冶石成刀斫石鄣破者是有神靈文當治此爲國君王斫不入者是刀無神靈進斫石鄣如龍淵干將之斬蘆藁由是入情漸附今斫石尙在魚刀猶存傳國子孫如斬蛇之劍也椎嘗使文遠行商賈北到上國多所聞見以晉愍帝建興中南至林邑教王范逸制造城池繕治戎甲經始廓略王愛信之使爲將帥能得衆心文讒王諸子或徙或奔王乃獨立成帝咸和六年死無允嗣文迎王子於外國海行取水置毒椰子中飲而殺之遂脅國人自立爲王取前王妻妾置高樓上有從已者取而納之不從已者絕其

飲食而死江東舊事云范文本揚州人少被掠為奴賣

墮交州年十五六遇罪當得杖畏怖因逃隨林邑賈人

渡海遠去沒入于王大被幸愛經十餘年王死文害王

二子詐殺侯將自立為王威加諸國一清按通鑑晉紀

日南夷帥范椎有奴曰范文後至林邑林邑王范逸愛

信之是歲逸卒文詐迎逸于他國置毒于椰酒而殺

之文自立為王于是出兵攻大岐界小岐界式僕徐狼

屈都乾魯扶單等國皆滅之篇中所紀諸地名皆夷王

國也屈都徐或夷椎蠻語口食鼻飲或雕面鏤身脫衣

狼並見前裸種漢魏流赭一清按漢書刑法志云赭衣塞路咸為

其用建元二年攻日南九德九真百姓奔迸千里無烟

乃還林邑林邑西去廣州二千五百里城西南角高山

長嶺連接天鄣嶺北接澗大源淮水出邠邠遠界三重

長洲隱山遶西曲街迴北其嶺南開澗小源淮水出松

根界上山壑流隱山遶南曲街迴東合淮流以注典沖

其城西南際山東北瞰水重塹流浦周繞城下東南塹

外因傍薄城東西橫長南北縱狹北邊兩端迴折曲入

城周圍八里一百步塹城二丈上起塹牆一丈開方隙

孔塹上倚板板上層閣閣上架屋屋上構樓高者六七

丈下者四五丈飛觀鷗尾迎風拂雲緣山瞰水騫翥鬼

粵但制造壯拙稽古夷俗城開四門東為前門當兩淮

渚濱於曲路有古碑夷書銘讚前王胡達之德西門當

水經注釋

卷三十六

兩重塹北迴上山山西卽淮流也南門度兩重塹對溫公壘升平二年交州刺史溫放之殺交阯太守杜寶別駕阮郎遂征林邑水陸累戰佛保城自守重求請服聽之今林邑東城南五里有溫公二壘是也北門濱淮路斷不通城內小城周圍三百二十步合堂瓦殿南壁不開兩頭長屋脊出南北南擬背曰西區城內石山順淮面陽開東向殿飛檐鴟尾青瑱丹堦棖題角椽多諸古法閣殿上柱高城丈餘五牛屎爲泥牆壁青光迴度曲掖綺牖紫窗椒房嬪媵無別宮觀路寢永巷共在殿上臨踞東軒逕與下語子弟臣侍皆不得上屋有五十餘

邱連蔓接棟檐宇如承神祠鬼塔小大八廟層臺重榭狀似佛刹郭無市里邑寡人居海岸蕭條非生民所處而首渠以永安養國十世豈久存哉元嘉中檀和之征林邑其王楊邁舉國夜奔竄山藪據其城邑收寶巨億軍還之後楊邁歸國家國荒殄時人靡存躊躇崩擗憤絕復蘇卽以元嘉二十三年死初楊邁母懷身夢人鋪楊邁金席與其兒落席上金光色起昭晰艷曜華俗謂上金爲紫磨金夷俗謂上金爲楊邁金父胡達死龔王位能得人情自以靈夢爲國祥慶其太子初名咄後楊邁死咄年十九代立慕先君之德復改名楊邁昭穆二

世父子其名知林邑之將亡矣其城隍塹之外林棘荒  
蔓榛梗冥鬱藤盤筍秀參錯際天其中香桂成林氣清  
煙澄桂父縣人也棲居此林服桂得道時禽異羽翔集  
閒關兼比翼鳥不比不飛鳥名歸飛鳴聲自呼此戀鄉  
之思孔悲桑梓之敬成俗也豫章俞益期性氣剛直不  
下曲俗容身無所遠適在南與韓康伯書曰惟檳榔樹  
最南遊之可觀但性不耐霜不得北植不遇長者之目  
令人恨深嘗對飛鳥戀土增思寄意謂此鳥其背青其  
腹赤丹心外露鳴情未達終日歸飛飛不十千路餘萬  
里何由歸哉九真太守任延始教耕犁俗化交土風行

象林知耕以來六百餘年火耨耕藝法與華同名白田  
種白穀七月火作十月登熟名赤田種赤穀十二月作  
四月登熟所謂兩熟之稻也至于草甲萌芽穀月代種  
種稔早晚無月不秀耕耘功重收穫利輕熟速故也米  
不外散恆爲豐國桑蠶年八熟繭三都賦所謂八蠶之  
繇者矣其小水崖羃懸常吐飛漚或雪霏沙漲清寒無  
底分溪別壑津濟相通其水自城東北角流水上懸起  
高橋渡淮北岸卽彭龍區粟之通達也檀和之東橋大  
戰楊邁被創落象卽是處也其水又東南流逕船官口  
船官川源徐狼外夷皆裸身男以竹筒掩體女以樹葉



蔽形外名狼臙所謂裸國者也雖習俗裸袒猶恥無蔽  
 惟依瞑夜與人交市闇中齷金便知好惡明朝曉看皆  
 如其言自此外行得至扶南按竺芝扶南記曰扶南去  
 林邑四千里水步道通檀和之令軍入邑浦據船官口  
 城六里者也自船官下注大浦之東湖大水連行潮上  
 西流潮水日夜長七八尺從此以西朔望并潮一上七  
 日水長丈六七七日之後日夜分為再潮水長一二尺  
 春夏秋冬厲然一定高下定度水無盈縮是為海運亦  
 曰象水也又兼象浦之名晉功臣表所謂金潏清逕象  
 渚澄源者也其川浦渚有水蟲彌微攢木食船數十日

壞源潭湛瀨有鮮魚色黑身五丈頭如馬首伺人入水  
 便來為害山海經曰離耳國雕題國皆在鬱水南林邑  
 記曰漢置九郡儋耳預焉一清按九郡謂南海蒼梧鬱  
 耳朱崖而為九儋耳朱崖既民好徒跣耳廣垂以為飾  
 雖男女褻露不以為羞暑褻薄日自使人黑積習成常  
 以黑為美離騷所謂元國矣然則儋耳即離耳也王氏  
 交廣春秋曰朱崖儋耳二郡與交州俱開皆漢武帝所  
 置大海中南極之外對合浦徐聞縣清朗無風之日遙  
 望朱崖州如園廩大從徐聞對渡北風舉帆一日一夜  
 而至周迴二千餘里徑度八百里人民可十萬餘家皆

殊種異類被髮雕身而女多姣好白皙長髮美鬢犬羊  
 相聚不服德教儋耳先廢朱崖數叛元帝以賈捐之議  
 罷郡楊氏南裔異物志曰儋耳朱崖俱在一清按下有脫文應劭張  
 晏皆云在大海中也臣瓚曰茂陵書珠崖治暉都去長  
 安七千三百一十四里儋耳去長安七千三百六十八  
 里領分爲東蕃故山海經曰在鬱水南也鬱水又南自  
 壽泠縣注于海昔馬文淵積石爲塘達于象浦建金標  
 爲南極之界俞益期箋曰馬文淵立兩銅柱于林邑岸  
 北有遺兵十餘家不反居壽泠岸南而對銅柱悉姓馬  
 自婚姻今有二百戶交州以其流寓號曰馬流言語飲  
 食尚與華同山川移易銅柱今復在海中正賴此民以

識故處也林邑記曰建武十九年馬援樹兩銅柱于象  
 林南界與西屠國分漢之南疆也土人以其流寓號曰  
 馬流世稱漢子孫也山海經曰鬱水出象郡而東南注  
 南海入須陵東南者也一清按漢志鬱林郡廣鬱縣鬱  
 水東至四會入海過郡四行四  
 千三百里應劭曰鬱水出廣信東入海言始或可終則非矣

水經注釋卷三十六終

海甯錢保塘  
華陽吳祖椿覆校

水經注釋卷三十七

仁和趙一清誠夫錄

淹水 葉榆水 夷水 油水

澧水 沅水 浪水

淹水出越篤遂久縣徼外

呂忱曰淹水一曰復水也

東南至靖蛉縣

縣有禺同山其山神有金馬碧雞光景儵忽民多見之  
漢宣帝遣練大夫王褒祭之欲致其雞馬褒道病而卒  
是不果焉王褒碧雞頌曰敬移金精神馬縹碧之雞故

左太冲蜀都賦曰金馬騁光而絕影碧雞儵忽而耀儀  
又東過姑復縣南東入于若水

淹水逕縣之臨池澤全氏曰漢志越嵩郡姑復縣臨池澤在南又青蛉縣臨池澤在北澤

之與濤不知何以分也一清按濤即澤也二縣地界以此而分方輿紀要姑復縣在四川會川衛南沈約志雲南有東西二古復州大姚縣北復縣而東北逕雲南縣

青蛉廢縣在雲南姚州大姚縣北復縣而東北逕雲南縣

西東北注若水也日縣西高山相連有大泉水周旋萬

益州葉榆河出其縣北界屈從縣東北流

縣故滇池葉榆之國也漢武帝元封二年使唐蒙開之  
以為益州郡郡有葉榆縣縣西北十里有弔烏山眾鳥

千百為羣共會嗚呼啁晰每歲七八月至集六七日則  
止一歲六至雉雀來弔夜然火而取之其無嗟不食似  
特悲者以為義鳥則不取也俗言鳳凰死于此山故眾  
鳥來弔因名曰弔烏縣之東有葉榆澤葉榆水所鍾而

為此川藪也禹貢錐指曰蔡傳述程大昌之論曰樊綽稱西洱河者却與漢志葉榆澤相貫廣處可二十里既足以界別二州其流又正趨南海又漢滇池即葉榆之  
地武帝初開滇嶠時其道元皆謂此澤以榆葉所漬得名必不能附會而綽及道元皆謂此澤以榆葉所漬得名則其水之黑似榆葉積清所成且其地乃蜀之正西又東北距岩昌不遠岩昌即三苗裔與三苗之敘于三危者又為相應莫此之明也而傳同叙非之杏溪之識遠過九峯矣葉榆本蠻語與中國文義不同安知為榆樹之葉澤以榆葉所漬得名檢麗注無此言蓋亦出樊綽韓汝節云此說尤不通源之黑或由榆葉所漬若流

去數千里其色尚不變有是理乎且他處黑水甚多未聞皆有樹葉落其下也宕昌國唐為宕州地州南至扶州四百一十里北至岷州二百五十里蓋古梁州之北界而程氏云葉榆河在蜀之正西東北距宕昌不遠計宕昌西南距大理凡三千餘里而猶謂之不遠豈生不見圖籍乎且葉榆縣在益州郡西七百餘里縣東有葉榆澤其下流雖逕滇池縣南而未嘗有黑水之稱安得謂其所祠即黑水之源哉一清按葉榆范史滇王哀牢傳俱作黑榆章懷注云牒或作蝶則此水果非因榆葉所漬致黑足以折九峯之妄而挂樊生之口矣樊綽唐咸通中為安南都護蔡襲從事著蠻書十卷見唐書藝文志

過不韋縣

縣故九隆哀牢之國也有牢山其先有婦人名沙臺朱氏謀漢書作沙壹于牢山捕魚水中觸沈木若有感因懷孕產十子後沈木化為龍出水九子驚走小子不能去

背龍而坐龍因挖

朱氏謀璋箋曰後漢書作猓

之其母鳥語謂背為

九謂坐為隆因名為九隆及長諸兄遂相共推九隆為王後牢山下有一夫一婦生十女九隆皆以為妻遂因孳育皆畫身像龍文衣皆著尾九隆死世世不與中國通漢建武二十三年王遣兵乘箠船南下水攻漢鹿芎民鹿芎民弱小將為所擒于是天大震雷疾雨南風漂起水為逆流波湧二百餘里箠船沈沒溺死數千人後數年復遣六王將萬許人攻鹿芎鹿芎王與戰殺六王哀牢耆老共埋之其夜虎掘而食之明旦但見骸骨驚怖引去乃懼耆老謂其小王曰哀牢犯徼自古有之今

此攻鹿芎輒被天誅中國有受命之王乎何天祐之明也即遣使道越雋奏獻求乞內附長保塞徼漢明帝永平十二年置為永昌郡郡治不韋縣蓋秦始皇徙呂不韋子孫于此故以不韋名縣沈氏曰常璩云武帝置不韋縣徙南越相呂嘉宗族于此因名不韋以章其先人之惡非秦徙也北去葉榆六百里葉榆水不逕其縣自不韋北注者盧倉禁水耳葉榆水自縣南逕遂久縣東又逕姑復縣西與淹水合又東南逕永昌邪龍縣縣以建興三年劉禪分隸雲南于不韋縣為東北

東南出益州界

葉榆水自邪龍縣東南逕秦藏縣南與僕水同注滇池

澤於連然雙柏縣也葉榆水自澤又東北流逕滇池縣南又東逕同並縣南又東逕漏江縣伏流山下復出蝮口謂之漏江左思蜀都賦曰漏江伏流潰其阿汨若湯谷之揚濤沛若濛汜之湧波諸葛亮之平南中也戰于是水之南葉榆水又逕賁古縣北東與盤江合盤水出律高縣東南監町山一清按漢志注師古曰監音呼鷄反町音挺東逕梁水郡北賁古縣南水廣百餘步深處十丈甚有瘴氣朱哀之反李恢追至盤江者也建武十九年伏波將軍馬援上言從麋泠出賁古擊益州臣所將越駱萬餘人便習戰鬪者二千兵以上弦毒矢利以數發矢注如雨所中

輒死愚以行兵此道最便蓋承藉水利用為神捷也盤  
 水又東逕漢興縣山溪之中多生邛竹桄榔樹樹出麩  
 而夷人資以自給故蜀都賦曰邛竹緣嶺又曰麩有桄  
 榔盤水北入葉榆水諸葛亮入南中戰於盤東是也  
 入牂柯郡西隨縣北為西隨水又東出進桑關

進桑縣牂柯之南部都尉治也水上有關故曰進桑關  
 也故馬援言從麋泠水道出進桑王國至益州賁古縣  
 轉輸通利益兵車資運所由矣全氏曰漢志牂柯郡西  
 隨縣麋水西受徼外東  
 至麋泠入尚龍谿過郡二行千一百六里都夢縣壺水  
 東南至麋泠入尚龍谿過郡二行千一百六里益州  
 來唯縣勞水出徼外東至麋泠入南海過郡二行三千  
 五百六十里是皆所云麋泠水道也而壺水獨無聞

自西隨至交阯崇山接險水路三千里葉榆水又東南  
 絕溫水而東南注於交阯

過交阯麋泠縣北分為五水絡交阯郡中至東界復合為  
 三水東入海

尚書大傳曰堯南撫交阯于禹貢荊州之南垂幽荒之  
 外故越也周禮南八蠻雕題交阯有不粒食者焉春秋  
 不見于傳不通于華夏在海島人民鳥語秦始皇開越  
 嶺南立蒼梧南海交阯象郡漢武帝元鼎二年始并百  
 越啟七郡于是乃置交阯刺史以督領之初治廣信所  
 以獨不稱州時又建朔方明已始開北垂遂辟交阯於

南為子孫基趾也

一清按後漢書章懷注引輿地志云其夷足大指開折兩足並立趾則相交趾與趾同古字通用然則非因武帝置郡而有子孫基趾之說也此蓋襲應劭漢官儀之文

漢武帝元鼎六年開都尉治交州外域記曰越王令二

使者典主交趾九真二郡民後漢遣伏波將軍路博德

討越王路將軍到合浦越王令二使者齎牛百頭酒干

鍾及二郡民戶口簿詣路將軍乃拜二使者為交趾九

真太守諸雒將主民如故

全氏祖望曰按交趾長稱西于王見漢書功臣表左將黃

道記謂南越侯繇封羸樓侯亦非也交趾郡及州本治

於此也州名為交州後朱載雒將子名詩索麋泠雒將

女名徵側為妻

一清按索妻猶言娶婦范史南蠻西南夷傳云嫁為朱鸞人詩索妻亦繆之甚

矣側為人膽勇將詩起賊攻破州郡服諸雒將皆屬

徵側為王治麋泠縣得交趾九真二郡民二歲調賦後

漢遣伏波將軍馬援將兵討側詩走入金溪究

全氏曰按金谿范史作禁谿章懷注引越志作

金溪穴一清按穴乃究字之誤三歲乃得爾時西蜀並

遣兵共討側等悉定郡縣為令長也山多大蛇名曰髯

蛇長十丈圍七八尺常在樹上伺鹿獸鹿獸過便低頭

繞之有頃鹿死先濡令溼訖便吞頭角骨皆鑽皮出山

夷始見蛇不動時便以大竹籤籤蛇頭至尾殺而食之

以為珍異故楊氏南裔異物志

一清按隋書經籍志交州異物志一卷楊孚撰曰髯惟大蛇既洪且長采色駭犖其文錦章食豕吞鹿



腴成養創賓享嘉宴是豆是觴言其養創之時肪腴甚  
 肥搏之以婦人衣投之則蟠而不起走便可得也此二  
 水左水東北逕望海縣南建武十九年馬援征徵側置  
 又東逕龍淵縣北又東合南水自麋泠縣東逕封溪縣  
 北交州外域記曰交阯昔未有郡縣之時土地有雒田  
 其田從潮水上下民墾食其田因名為雒民設雒王雒  
 侯主諸郡縣多為雒將雒將銅印青綬後蜀王子將  
 兵三萬來討雒王雒侯服諸雒將蜀王子因稱為安陽  
 王後南越王尉他舉眾攻安陽王安陽王有神人名臯  
 通下輔佐為安陽王治神弩一張一發殺三百人南越

王知不可戰却軍住武甯縣按晉太康記縣屬交阯全氏

日九字注南越遣太子名始降服安陽王稱臣事之安陽

王不知通神人遇之無道通便去語王曰能持此弩王

天下不能持此弩者亡天下通去安陽王有女名曰媚

珠見始端正珠與始交通始問珠令取父弩視之始見

弩便盜以鋸截弩訖便逃歸報南越王南越進兵攻之

安陽王發弩弩折遂敗安陽王下船逕出于海今平道

縣後王宮城見有故處晉太康地記縣屬交阯全氏曰

中注南越遂服諸雒將馬援以西南治遠路逕千里分置

斯縣治城郭穿渠道溉灌以利其民縣有猩猩獸形

若黃狗又狀豸純人面頭顏端正善與人言音聲麗妙  
 如婦人好女對語交言聞之無不酸楚其肉甘美可以  
 斷穀窮年不厭又東逕浪泊馬援以其地高自西里進  
 屯此又東逕龍淵縣故城南又東左合北水建安二十  
 三年一清按浪水篇作建安二十二年立州之始蛟龍蟠編于南北二  
 津故改龍淵以龍編為名也盧循之寇交州也交州刺  
 史杜慧度率水步晨出南津以火箭攻之燒其船艦一  
 時潰散循亦中矢赴水而死于是在斬之傳首京師慧度  
 以斬循勳封龍編侯劉欣期交州記曰龍編縣功曹左  
 飛曾化為虎數月還作吏既言其化亦化無不在牛哀

易虎不識厥兄當其革狀安知其譌變哉其水又東逕  
 曲易縣東流注于浪鬱經言于郡東界復合為三水此  
 其一也全氏曰當作此其二也二水謂南水北水其次一水謂中水合之為三水其次一水  
 東逕封谿縣南又西南逕西于縣南又東逕羸樓縣北  
 又東逕北帶縣南又東逕稽徐縣涇水注之水出龍編  
 縣高山東南流入稽徐縣注于中水中水又東逕羸樓  
 縣南交州外域記曰縣本交趾郡治也林邑記曰縣自  
 交趾南行都官塞浦出焉其水自縣東逕安定縣北帶  
 長江江中有越王所鑄銅船潮水退時人有見之者其  
 水又東流隔水有泥黎城言阿育王所築也又東南合

南水南水又東北逕九德郡北交州外域記曰交阯郡界有扶巖究在郡之北隔渡一江卽是水也江北對交阯朱贛縣又東逕浦陽縣北又東逕無切縣北建武十九年九月馬援上言臣謹與交阯精兵萬二千人與大兵合二萬人船車大小二千艘自入交阯于今爲盛十月援南入九真至無切縣賊渠降進入餘發渠帥朱伯棄郡亡入深林巨藪犀象所聚羣牛數千頭時見象數十百爲羣援又分兵入無編縣王莽之九真亭全氏曰六字注中至居風縣帥不降並斬級數十百九真乃靖其水又東逕句漏縣縣帶江水江水對安定縣林邑記所謂外

越安定紀粟者也江中有潛水牛形似水牛上岸鬪角軟還入江水角堅復出又東與北水合又東注鬱亂流而逝矣此其三也平撮通稱同歸鬱海故經有入海之文矣

夷水出巴郡魚復縣江

夷水卽佷山清江也水色清照十丈分沙蜀人見其澄

清因名清江也一清按應劭曰夷山在夷陵西南又云夷水出巫東入江然夷水之源最遠方

輿紀要云源出蠻中南流名柘林溪經天池洛浦名黔黎溪南至金洞唐崖入黔江縣名黔江又云黔江自貴州思州之上費溪發源經五十八節名灘至黔州境分流入黔江縣界爲施州江入湖廣施州衛謂之清江是也水源之遠如此是以善長不記其所出而以佷山清江爲限至應劭所云夷山似因夷水得名大類常璩漾

山漾水之殊目不足為據江東水篇經云江水又東南過夷道縣北夷水從山出江而胡牘明云禹循江而南且東以至於巫山乃不出江而並夷水以東至于澧澧水沅水以至於衡山導江出東別為沱又東入宜都江則不經三峽可知又云夷水首出魚復江尾入楚避三峽之行五百餘里是亦荆州之沱也古時自巴入楚避三峽之險皆由此路是亦荆州之沱也古時自巴入楚避三峽之積粟起于汶山浮江以下至楚三千餘里船載卒一東盡城守矣黔中巫郡非王之拒扞關擊楚取此言舟師自夷水以入楚也楚世家蕭王四年蜀伐楚取茲方于是楚為扞關以拒之經注江出三峽拒扞關則不逕巫峽明矣遣將田戎等乘枋上江以下拒扞關漢建武中孫述遣將田戎等乘枋上江則皆取道于三峽而復由夷水矣蓋其時水已淺狹河不勝戰艦自後荆梁用師未有不由峽江者然酈注云

成斷港故章懷注西南夷傳寰宇記明一統志不復知此水出西北奉節之大江而以爲西南施州衛之山源然自漢志已不言首受江未知何故班氏疎略頗多水經注源委詳明而又有張儀之言爲證無可疑者禹導江自梁入荆必浮此水也東樵此言較宛溪爲覈然則夷水乃跨有荆梁之沱禹貢所記二州指此已備紛紛鄆江玉輪江鄆江枝昔廩君浮土舟於夷水據捍關而江皆後起之名耳王巴是以法孝直有言魚復扞關臨江據水實益州禍福之門夷水又東逕建平沙渠縣縣有巫城南岸臨水山道五百里其水歷縣東出焉

東南過徂山縣南

夷水自沙渠縣入水流淺狹裁得通船東逕難畱城南城卽山也獨立峻絕西面上里餘得石穴把火行百許

水經注卷之二十七 夷水  
步得二大石積並立穴中相去一丈俗名陰陽石陰石  
常溼陽石常燥每水旱不調居民作威儀服飾往入穴  
中旱則鞭陰石應時雨多雨則鞭陽石俄而天晴相承  
所說往往有效但捉鞭者不壽人頗惡之故不爲也東  
北面又有石室可容數百人每亂民入室避賊無可攻  
理因名難畱城也昔巴蠻有五姓未有君長俱事鬼神  
乃共擲劍於石穴約能中者奉以爲君巴氏子務相乃  
中之又令各乘土舟約浮者當以爲君唯務相獨浮因  
共立之是爲廩君乃乘土舟從夷水下至鹽陽鹽水有  
神女謂廩君曰此地廣大魚鹽所出願畱共居廩君不

許鹽神暮輒來宿旦化爲蟲羣飛蔽日天地晦暝積十  
餘日廩君因伺便射殺之天乃開明廩君乘土舟下及  
夷城夷城石岸嶮曲其水亦曲廩君望之而嘆山崖爲  
崩廩君登之上有平石方二丈五尺因立城其傍而居  
之四姓臣之死精魂化而爲白虎故巴氏以虎飲人血  
遂以人祀鹽水卽夷水也全氏曰按江水篇夷水出夷  
谿鹽水出巫溪今此合爲一  
又有鹽石卽陽石也盛宏之以是推之疑卽廩君所射  
鹽神處也將知陰石是對陽石立名矣事旣鴻古難爲  
明徵夷水又東逕石室在層巖之上石室南向水出其  
下懸巖千仞自水上逕望見每有陟山嶺者扳木側足

而行莫知其誰村人駱都小時到此室邊採蜜見一仙人坐石牀上見都凝矚不轉都還招村人重往則不復見鄉人今名爲仙人室袁山松云都孫息尙存夷水又東與溫泉三水合大溪南北夾岸有溫泉對注夏煖冬熱上常有霧氣瘍疾百病浴者多愈父老傳此泉先出鹽于今水有鹽氣夷水有鹽水之名此亦其一也夷水又東逕佷山縣故城南縣卽山名也孟康曰音恆出藥草恆山今世以銀爲音也全氏曰孟康曰下舊武陵之十七字注中注屬縣南一里卽清江東注矣南對長楊溪溪水西南潛穴穴在射堂村東六七里谷中有石穴清泉瀆流三十

許步復入穴卽長楊之源也水中有神魚大者二尺小者一尺居民釣魚先陳所須多少拜而請之拜訖投釣餌得魚過數者水輒波湧暴風卒起樹木摧折水側生異花路人欲摘者皆當先請不得輒取水源東北之風井山迴曲有異勢穴口大如盆袁山松云夏則風出冬則風入春秋分則靜余往觀之其時四月中去穴數丈須臾寒慄言至六月中尤不可當往人有冬過者置笠穴中風吸之經月還步楊溪得其笠則知潛通矣其水重源顯發北流注于夷水此水清冷甚于大溪縱暑伏之辰尙無能燥其津流也縣北十餘里有神穴平居無

水時有渴者誠啟請乞輒得水或戲求者水終不出縣東十許里至平樂村又有石穴出清泉中有潛龍每至大旱平樂村左近村居輦草穢著穴中龍怒須與水出蕩其草穢傍側之田皆得澆灌從平樂順流五六里東亭村北山甚高峻上台下空空微東西廣二丈許高起如屋中有石牀甚整頓傍生野韭人往乞者神許則風吹別分隨偃而揃不得過越不偃而揃輒凶往觀者去時特平暨處自然恭肅矣

又東過夷道縣北

夷水又東逕虎灘岸石有虎像故因以名灘也夷水又

東逕釜瀨其石大者如釜小者如刁斗形色亂真唯實中耳夷水又東北有水注之其源百里與丹水出西南望州山山形竦峻峰秀甚高東北白巖壁立西南小演通行登其頂平可有三畝許上有故城城中有水登城望見一州之境故名望州山俗語訛今名武鍾山山根東有湧泉成溪卽丹水所發也下注丹水天陰欲雨輒有赤氣故名曰丹水矣丹水又逕亭下有石穴甚深未嘗測其遠近穴中蝙蝠大者如烏悉多倒懸元中記曰蝙蝠百歲者倒懸得而服之使人神仙穴口有泉冬溫夏冷一清按此處有脫文蓋言泉水秋則入藏春則出

遊民至秋闌斷水口得魚大者長四五尺骨軟肉美異於餘魚丹水又逕其下積而為淵淵有神龍每旱村人以蔞草投淵上流魚則多死龍怒當時大雨丹水又東北流兩岸石上有虎跡甚多或深或淺皆悉成就自然咸非人工丹水又北注于夷水水色清澈與大溪同夷水又東北逕夷道縣北而東注

東入于江

夷水又逕宜都北東入大江有涇渭之比亦謂之佷山北溪水所經皆石山略無土岸其水虛映俯視遊魚如乘空也淺處多五色石冬夏激素飛清傍多茂木空岫

靜夜聽之恆有清響百鳥翔禽哀鳴相和巡頽浪者不覺疲而忘歸矣

油水出武陵孱陵縣西界

縣有白石山油水所出東逕其縣西與滄水合水出高成縣滄山東逕其縣下東至孱陵縣入油水也

東過其縣北

縣治故城王莽更名孱陸也劉備孫夫人權妹也又更修之其城背油向澤

又東北入于江

油水自孱陵縣之東北逕公安縣西又北流注于大江



澧水出武陵充縣西歷山東過其縣南

澧水自縣東逕臨澧零陽二縣故界水之南岸白石雙立厥狀類人高各三十丈周四丈古老傳言昔充縣尉與零陽尉共論封境因相傷害化而為石東標零陽西揭充縣後即其地為臨澧縣之故治臨側澧水即為縣名晉太康四年置澧水又東茹水注之水出龍茹山水色清澈漏石分沙莊辛說楚襄王所謂飲茹溪之流者也茹水東流注入澧水

又東過零陽縣之北

澧水東與溫泉水會水發北山石穴中長三十丈冬夏

沸湧常若湯焉溫水南流注于澧水澧水又東合零溪

水源南出零陽之山歷溪北注澧水

一清按漢志武陵郡零陽縣應劭曰

零水所出東入湘殆即零溪也而道元以為入澧

澧水又東九渡水注之水南

出九渡山山下有谿又以九渡為名山獸咸飲此水而逕越他津皆不飲之九渡水北逕僊人樓下傍有石形極方峭世名之為仙樓水自下歷溪曲折逶迤傾注行者間關每所褰沂山水之號蓋亦因事生焉九渡水又北流注于澧水澧水又東婁水入焉水源出巴東界東逕天門郡婁中縣北又東逕零陽縣注于澧水澧水又東逕零陽縣南郡緣零溪以著稱矣澧水又逕澧陽縣

右會溧水水出建平郡東逕溧陽縣南晉太康中置溧水又左合黃水水出零陽縣西北連巫山溪出雄黃頗有神異採之常以冬月祭祀鑿石深數丈方得佳黃故溪水取名焉黃水北流注于溧水溧水又東注澧水謂之溧口澧水又東逕澧陽縣南南臨澧水晉太康四年立天門郡治也吳永安六年武陵郡嵩梁山高峯孤竦素壁千尋望之若亭有似香爐其山洞開元朗如門高三百丈廣二百丈門角上各生一竹倒垂下拂謂之天帝孫休以為嘉祥分武陵置天門郡澧水又東歷層步山高秀特立山下有峭瀾泉流所發南流注于澧水

又東過作唐縣北

作唐縣後漢分孱陵縣置澧水入縣左合涔水水出西

南天門郡界南流逕涔坪屯屯竭涔水溉田數千頃清

按說文涔陽渚在郢中又東南流注于澧水澧水又東澹水出焉

澧水又南逕故郡城東東轉逕作唐縣南澧水又東逕

南安縣南晉太康元年分孱陵立澹水注之水上承澧

水於作唐縣東逕其縣北又東注于澧謂之澹口一清按澹

水三國時亦曰澹水吳書黃蓋傳所謂巴醴由澹者也由卽油水澹卽澹水也王仲宣贈士孫

文始詩曰悠悠澹澹者也澧水又東與赤沙湖水會湖

水北通江而南注澧謂之沙口澧水又東南注于沅水

曰澧口蓋其枝瀆耳離騷曰沅有芷兮澧有蘭

又東至長沙下雋縣西北東入于江

澧水流注于洞庭湖俗謂之曰澧江口也

沅水出牂柯且蘭縣一清按漢志續志皆云故且蘭至晉志始去故字宋志云且蘭合漢舊縣

故且蘭是也此條經文與江且蘭是也此條經文與為旁溝水又東至鐔成縣為沅

水江且蘭是也此條經文與東逕無陽縣一作清按後漢省無陽故不見于續志晉志

句之非是有脫文朱謀埠箋曰舊本注文據宋本此

經文非是有脫文朱謀埠箋曰舊本注文據宋本此

西南五里自貴州番界入沅州境又云澧水在州南四

里又引熊氏曰今辰州之武溪即古舞水沅州之澧溪

蓋即沅水之異名耳按諸書皆謂澧水即沅水之混澧

沅而一之其說均非不可不辨蓋熊氏之以澧水即沅

水者由誤以武溪即澧水耳今瀘溪縣志亦祖其說是

踵誤也夫無水之名見于水經注武溪之名亦見于水

辰州盧溪縣西有武溪源出武山南注于沅後漢書注今

水在盧溪縣西有武溪源出武山南注于沅後漢書注今

別顧熊氏之為此說或因荆蘭東南入沅之無水迺

故遂以武溪當無溪與不知五溪之名出入不一武溪

之不能當無溪猶無溪與不知五溪之名出入不一武溪

注者為足據耳至于顧氏之言則又泥解水經注何也

漢書注言無水首受故且蘭之言則又泥解水經注何也

出既異文則義出自有故且蘭之言則又泥解水經注何也

南流至鐔成縣為沅水故鐔成縣今黔陽也水經注言無水

鐔成耶乃或疑縣無沅水故鐔成縣今黔陽也水經注言無水

沅無總一水之說不知舊本此段經文自沅水出牂柯

云云至東至鐔成縣為沅水故鐔成縣今黔陽也水經注言無水

字則注起語也鄺道元魏人其所謂無陽縣者乃晉

義熙中徙故鐔成縣之無陽亦即今黔陽已非漢舊故南

漢之無陽為故縣以別之且下即云無水出故且蘭南

水經注卷三十七

流至無陽故縣者蓋謂沅之上流另有一支之水流入  
 于沅故注文至謂之無口句下又云沅水東逕無陽縣  
 前有故字而後無故字則五字之非經文可知自朱鬱  
 儀移作經文且自謂據宋本改正鬱儀號稱博雅其點  
 竄古人無穿鑿附會顧氏不細釋經注漫以泝始析  
 流為得解強合為一以誤後人而莫有知其非者尤可  
 怪也無水出故且蘭南流至無陽故縣對無水因以氏  
 縣無水又東南入沅謂之無口一清按漢志無水首受  
 九十沅水東逕無陽縣南臨運水水源出東南岸許山  
 西北逕其縣南流注于熊溪熊溪南帶移山一清按浪  
 陽縣有移溪水篇注無山本在水北夕中風雨且而山移水南故  
 殆即熊溪也山以移為名蓋亦蒼梧郁州東武怪山之類也熊溪下  
 注沅水沅水又東逕辰陽縣縣有龍溪水南出于龍嶠

之山北流入于沅沅水又東溢水注之南出扶陽之山  
 北流會于沅沅水又東與序溪合水出武陵郡義陵縣  
 鄜梁山西北流逕義陵縣王莽之建平縣也治序溪其  
 城劉備之姊歸馬良出五溪綏撫蠻夷良率諸蠻所築  
 也一清按義陵縣後漢廢蜀志先主傳軍次秭歸武陵  
 五溪蠻夷遣使請兵將軍吳班陳式水軍屯夷陵夾  
 江東西岸先主自秭歸率諸將進軍緣山絕嶺于夷道  
 猓亭駐營自佷山通道武陵遣侍中馬良安撫五谿蠻  
 夷咸相響應良所築城即所治序溪最為沃壤良田數  
 百頃特宜稻修作無廢又西北入于沅一清按漢志武  
 梁山序水所沅水又東合柱水水導源柱溪北流注沅  
 出西入沅一清按序水方輿紀要作激水引舊志云今激浦縣南  
 有雙龍江其水一自縣南百二十里之龍潭發源一自

縣東二十里龍灣發源流經縣南二里之龍堆合流而  
西入于沅蓋卽序溪矣注又別名之曰柱溪柱序音同  
通用沅水又東逕辰陽縣南東合辰水水出縣三山谷  
故耳一清按漢志武陵郡辰陽縣三山谷辰水所出南入沅行七百五十里東南流合獨母水  
水源南出龍門山厯獨母溪北入辰水辰水又逕其縣  
北舊治在辰水之陽故卽名焉楚辭所謂夕宿辰陽者  
也王莽更名會亭矣辰水又右會沅水名之爲辰溪口  
武陵有五溪謂雄溪楠溪無溪酉溪辰溪其一焉夾溪  
悉是蠻左所居故謂此蠻爲五溪蠻也沅水又逕沅陵  
縣西有武溪源出武山與酉陽分山水源石上有盤瓠  
跡猶存矣盤瓠者高辛氏之畜狗也其毛五色高辛氏

患犬戎之暴乃募天下有能得犬戎之將軍吳將軍頭  
者妻以少女下令之後盤瓠遂銜吳將軍之首於闕下  
帝大喜未知所報女聞之以爲信不可違請行乃以配  
之盤瓠負妻入南山上石室中所處嶮絕人迹不至帝  
悲思之遣使不得進經二年生六男六女盤瓠死因自  
相夫妻織績木皮染以草實好五色衣裁置皆有尾其  
母白帝賜以名山其後滋蔓號曰蠻夷今武陵郡夷卽  
盤瓠之種落也其狗皮毛獠孫世寶錄之武水南流注  
于沅沅水又東施水注之水南出施山溪源有陽欺崖  
崖色純素望同積雪下有二石室先有人處其間細泉

輕流望川競注故不可得以言也施水北流會于沅沅  
水又東逕沅陵縣北漢故頃侯吳陽之邑也一清按漢表陽以高  
后元年封王莽改曰沅陸縣北枕沅水沅水又東逕縣故治  
北移縣治之舊城置都尉府因岡傍阿勢盡川陸臨沅  
對西二川之交會也西水導源益州巴郡臨江縣故武  
陵之充縣西原山東南流逕無陽故縣南又東逕遷陵  
故縣界與西鄉溪合即延江之枝津更始之下流謂之  
西鄉溪口西水又東逕遷陵縣故城北王莽更名曰遷  
陸也西水東逕酉陽故縣南縣故酉陵也西水又東逕  
沅陵縣北又東南逕潘承明壘西承明討五溪蠻營軍

所築也其城跨山枕谷西水又南注沅水關駟謂之受  
水其水所決入名曰酉口一清按漢志武陵郡充縣酉  
沅行千沅水又逕寶應明城側應明以元嘉初伐蠻所  
二百里築也沅水又東溪水南出茗山山深迴嶮人獸阻絕溪  
水北瀉沅川沅水又東與諸魚溪水合水北出諸魚山  
山與天門郡之澧陽縣分嶺溪水合南流會于沅沅水  
又東夷水入焉水南出夷山北流注沅夷山東接壺頭  
山一清按章懷後漢書注引武陵記曰此山與東山高  
海方壺山相似神仙多所遊集故名壺頭山也山高  
一百里廣圓三百里山下水際有新息侯馬援征武溪  
蠻停軍處壺頭徑曲多險其中紆折千灘援就壺頭希

効早成道遇瘴毒終沒于此忠以獲謗信可悲矣劉澄  
之曰沅水自壺頭枝分跨三十三渡逕交阯龍編縣東  
北入于海脈水尋梁乃非關究但古人許以傳疑聊書  
所聞耳

又東北過臨沅縣南

臨沅縣與沅南縣分水沅南縣西有夷望山孤竦中流  
浮嶮四絕昔有蠻民避寇居之故謂之夷望也南有夷  
望溪水南出重山遠注沅沅水又東得關下山東帶關  
溪瀉注沅瀆沅水又東歷臨沅縣西為明月池白璧灣  
灣狀半月清潭鏡澈上則風籟空傳下則泉響不斷行

者莫不擁櫂嬉遊徘徊愛玩沅水又東歷三石澗鼎足  
均峙秀若削成其側茂竹便娟致可翫也又東帶綠蘿

山頽巖臨水懸蘿釣渚漁詠幽谷浮響若鐘

朱氏謀璋箋曰御覽

引水經注云錄蘿蒙羈積巖臨水實釣渚漁詠之勝地其迭響若鐘音信為神仙之所居沅水又東

逕平山西南臨沅水寒松上蔭清泉下注栖託者不能  
自絕於其側沅水又東逕臨沅縣南縣南臨沅水因以  
為名王莽更之曰監沅也縣南有晉徵士漢壽人龔元  
之墓銘太元中車武子立縣治武陵郡下本楚之黔中  
郡矣秦昭襄王二十七年使司馬錯以隴蜀軍攻楚楚  
割漢北與秦至三十年秦又取楚巫黔及江南地以為

黔中郡漢高祖二年割黔中故治爲武陵郡王莽更之  
曰建平也南對沅南縣後漢建武中所置也縣在沅水  
之陰因以沅南爲名縣治故城昔馬援討臨鄉所築也  
沅水又東歷小灣謂之枉渚渚東里許便得枉人山山  
西帶脩溪一百餘里茂竹便娟披溪蔭渚長川逕引遠  
注于沅沅水又東入龍陽縣有澹水出漢壽縣西楊山  
南流東折逕其縣南縣治索城卽索縣之故城也漢順  
帝陽嘉中改從今名闕駟以爲興水所出東入沅而是  
水又東歷諸湖方南注沅亦曰漸水也水所入之處謂  
之鼎口一清按漢志武陵郡索縣漸水東入沅沅水又東歷龍陽縣之汜

洲洲長二十里吳丹楊太守李衡植柑于其上臨死勅  
其子曰吾州里有木奴千頭不責衣食歲絹千疋太史  
公曰江陵千樹橘可當封君此之謂矣吳末衡柑成歲  
絹千疋今洲上猶有陳根餘枿蓋其遺也全氏曰胡三  
相洲非橘洲湘水篇臨湘縣之橘洲乃衡所植也晏公  
類要曰湘江四洲橘洲其一焉張舜民郴行錄橘洲東  
對潭州以是沅水又東逕龍陽縣北城臨側沅水沅水  
知非汎洲也又東合壽溪內通大溪口有木連理根各一岸而陵空  
交合其水上承諸湖下注沅水

又東至長沙下雋縣西北入于江

一清按漢志牂柯郡故

陽入江資水篇經文與班志合則此條不容有  
參錯且與澧水篇經文相同惟少一東字耳



水經注釋 沅水 浪水

沅水下注洞庭湖方會于江

浪水出武陵鍾成縣北界沅水谷

山海經曰禱過之山浪水出焉而南流注于海是也

南至鬱林潭中縣與鄰水合

水出無陽縣故鍾成也晉義熙中改從今名俗謂之

移溪溪水南歷潭中注于浪水

又東至蒼梧猛陵縣為鬱溪又東至高要縣為大水

鬱水自鬱林之阿林縣東逕猛陵縣

全氏曰按漢志蒼梧郡猛陵縣龍山

合水所出南至布山入海而善長不志猛陵縣在廣信之西南王莽之猛

陸也浪水于縣左合鬱溪亂流逕廣信縣地理志曰蒼

梧郡治武帝元鼎六年開王莽之新廣郡縣曰廣信亭

王氏交廣春秋

一清按虞喜志林云太康八年廣州大中正王範上交廣二州春秋曰元

封五年交州自羸樓縣移治於此建安十六年吳遣臨

淮步騭為交州刺史將武吏四百人之交州道路不通

蒼梧太守長沙吳巨擁眾五千騭有疑于巨先使諭巨

巨迎之于零陵遂得進州巨既納騭而後有悔騭以兵

少恐不存立巨有都督區景勇略與巨同士為用騭惡

之陰使人請巨巨往告景勿詣騭騭請不已景又往乃

於廳事前中庭俱斬以首狗眾即此也鬱水又逕高要

縣晉書地理志曰縣東去郡五百里刺史夏避毒徙縣

水居也縣有鵠奔亭廣信蘇施妻始珠鬼訟于交州刺  
 史何敞處事與釐亭女鬼同王氏交廣春秋曰步騭殺  
 吳巨區景使嚴舟船合兵二萬下取南海蒼梧人衡毅  
 錢博宿巨部伍與軍逆騭于蒼梧高要峽口兩軍相逢  
 於是遂交戰毅與眾投水死者千有餘人一清按三國志吳書呂岱  
 傳云高涼賊帥錢博乞降岱因承制以博為高涼西部  
 都尉方輿紀要高涼山在高州府東北九十里本名高  
 梁衡毅錢博拒步騭于高要峽口毅死博與屬亡于高  
 梁蓋即此山是高要峽之戰毅死而博逃其後遂降也  
 交廣春秋未得其實

又東至南海番禺縣西分為二其一南入于海

鬱水分浪南注

其一又東過縣東南入于海

浪水東別逕番禺山海經謂之賁禺者也交州治中合  
 浦姚文式問云何以名為番禺答曰南海郡昔治在今  
 州城中與番禺縣連接今入城東南偏有水坑陵城倚  
 其上聞此縣人名之為番山縣名番禺儻謂番山之禺  
 也漢書所謂浮牂柯下離津同會番禺蓋乘斯水而入  
 越也秦并天下略定楊越置東南一尉西北一侯開南  
 海以謫徙民至二世時南海尉任囂召龍川令趙他曰  
 聞陳勝作亂豪傑叛秦吾欲起兵阻絕新道番禺負嶮  
 可以為國會病縣篤無人與言故召公來告以大謀囂

卒他行南海尉事則拒關門設守以法誅秦所置吏以其黨爲守自立爲王高帝定天下使陸賈就立他爲南越王剖符通使至武帝元鼎五年遣伏波將軍路博德等攻南越王五世九十二歲而亡以其地爲南海蒼梧鬱林合浦交阯九真日南也建安中吳遣步騭爲交州騭到南海見土地形勢觀尉他舊治處負山帶海博敞渺目高則桑土下則沃衍林麓鳥獸于何不有海怪魚鼈龜鼉鮮魴珍怪異物千種萬類不可勝紀他因岡作臺北面朝漢圓基千步直峭百丈頂上三畝複道迴環逶迤曲折朔望升拜名曰朝臺前後刺史郡守遷除新

至未嘗不乘車升履於焉逍遙騭登高遠望觀巨海之浩茫觀原藪之殷阜乃曰斯誠海島膏腴之地宜爲都邑建安二十二年遷州番禺築立城郭綏和百越遂用甯集交州治中姚文式問答云朝臺在州城東北三十里裴淵廣州記曰城北有尉他墓墓後有大岡謂之馬鞍岡秦時占氣者言南方有天子氣始皇發民鑿破此岡地中出血今鑿處猶存以狀取目故岡受厥稱焉王氏交廣春秋曰南越王趙他生有奉制稱藩之節死有祕奧神密之墓他之葬也因山爲墳其壟塋可謂奢大葬積珍玩吳時遣使發掘其墓求索棺柩鑿山破石費

日損力卒無所獲他雖奢僭慎終厥身乃令後人不知其處有似松喬遷景牧豎固無所殘矣鄧德明南康記曰昔有盧耽仕州為治中少棲仙術善解雲飛每夕輒陵虛歸家曉則還州嘗於元會至朝不及朝列化為白鵠至閣前迴翔欲下威儀以石擲之得一隻履耽驚還就列內外左右莫不駭異時步騭為廣州意甚惡之便以狀列聞遂至誅滅廣州記稱吳平晉滕脩為刺史脩鄉人語脩鰓鬚長一赤脩責以為虛其人乃至東海取鰓鬚長四赤一清按裴松之三國志注引王氏交廣春秋一赤作一丈四赤作一丈四尺送示脩脩始服謝厚為遣其一水南入者鬱川分派逕

四會入海也其一即川東別逕番禺城下漢書所謂淨

泔柯下離津同會番禺蓋乘斯水而入于越也一清按漢書以

下與前文複蓋刪削之未盡者泔水又東逕懷化縣入于海水有鰓魚

裴淵廣州記曰鰓魚長二丈大數圍皮皆鱗物生子子

小隨母覓食驚則還入母腹吳錄地理志曰鰓魚子朝

索食暮入母腹南越志曰暮從臍入旦從口出腹裏兩

洞腸貯水以養子腸容二子兩則四焉其餘又東至龍

川為涅水全氏曰按師古漢志注引裴氏廣州記曰龍川縣本博羅縣之東鄉也有龍穿地而出即

穴流泉因以為號屈北入員水浪水枝津衍注自番禺

東歷增城縣南越志曰縣多鷓鴣鷓鴣山雞也毛色鮮

明五采眩耀利距善鬪世以家雞鬪之則可擒也又逕  
 博羅縣西界龍川左思所謂目龍川而帶坳者也趙他  
 乘此縣而跨據南越矣員水又東南一千五百里入南  
 海東歷揭陽縣王莽之南海亭而注于海也

水經注釋卷三十七終

水經注釋卷三十七終

海甯錢保塘  
 華陽吳祖椿覆校

